


卷121
673
部五:73



文獻通考卷第二百七十八



鄱陽馬端臨貴與著

象緯考一

中宮三垣

漢天文志曰凡天文在圖籍昭昭可知者經星常宿中外官凡一百十八名積數七百八十三星皆有州國官

宮物類之象其伏見早晚邪正存亡虛實廣陜孟康曰伏見早

晚謂五星也日月五星下道為邪存謂列宿不虧也亡謂恒星不見虛實若天牢星實則因多虛則闕出之屬

也闕陜若三台及五星所行合散犯守陵歷鬪食孟康曰合

星相去遠近也同舍也散五星有變則精散為祲星也犯五寸以內光

芒相及也陵相冒過也食星月相凌不見者則所食也

乾隆十二年校刊

象緯一

韋昭曰自下往觸之曰犯居其宿曰守彗孛飛流日月
經之為歷突掩為凌星相擊為闕也
薄食張晏曰彗所以除舊布新也李氣似彗飛流謂飛星流星也孟康曰飛絕迹而去流光迹相連也日月無光曰薄京房易傳曰日月赤黃為薄或曰不暈適交而食曰薄韋昭曰氣往迫之為薄虧毀曰食也
背穴抱珥重蜺孟康曰背日旁氣也適日之將食先有黑之變也背形如背字也穴多作鑷其形如玉鑷也抱氣向日也珥形點黑也如淳曰暈讀曰運重或作虹蜺讀曰齧蟬棘謂之重表云雄為重雌為蜺凡氣在日上冠為戴在旁直對為珥在旁如半環向日為抱向外為背有氣刺日為鑷鑷扶傷也
風祆怪雲變氣此皆陰陽之精其本在地而上發於天者也政失於此則變見於彼猶景之象形鄉之應聲師曰鄉讀是是以明君覩之而寤飭身正事思其咎謝其過則禍除而福至自然之符也

晉天文志曰張衡云文曜麗乎天其動者有七日月五星是也日者陽精之宗月者陰精之宗五星五行之精眾星列布體生於地精成於列列居錯峙各有攸屬在野象物在朝象官在人象神其以神差有五列焉是為三十五名一居中央謂之北斗四布於方各七為二十八舍日月運行歷示吉凶五緯纏次用告禍福中外之官常明者百有二十四可名者三百二十為星二千五百微星之數蓋萬一千五百二十庶物蠢蠢咸得繫命不然何得總而理諸後武帝時太史令陳卓總甘石巫咸三家所著星圖大凡二百八十三官一千四百六十

乾隆十二年校刊
天象圖卷之二 象緯
二

四星以爲定紀今畧其昭昭者以備天官云

中宮同於紫微宮北極紫微宮

中元北極紫微宮北極五星在其中大帝之座第二珠第三之宮庶子居第一號曰爲太子四爲后宮五天樞

一云第三明者帝之居第四明曰四庶子最小第五天之樞左右四星是四輔天一

太一當門路左樞右樞夾南門兩面營衛一十五上宰少尉兩相對少宰上輔次少輔上衛少衛次上丞後門東邊大贊府門西喚作一少丞以次却向門前數陰德門裏兩黃聚尚書以次其位五女史柱史各一戶御女

四星五天柱大理兩星二陰德邊勾陳尾指北極顛勾陳六星六甲前天皇獨在勾陳裏五帝內座後門是華蓋并杠十六星杠作柄象華蓋形蓋上連連九箇星名曰傳舍如連丁垣外左右各六珠右是內階左天厨階前八星名八穀厨下五箇天棊宿天床六星左樞在內厨兩星右樞對文昌斗上半月形希疎分明六箇星文昌之下曰三公太尊只向三公明天牢六星太尊邊太陽之守四勢前一箇宰相太陽側更有三公相西邊卽是元戈一星圓天理四星斗裏暗輔星近著開陽淡

一本云文

昌之下三師各天牢六星四勢前更有二公相西偏卽是太陽一星圓天理四星斗裏暗輔星近著開陽淡

北斗之星七宿明第一主帝名樞精第二第三璇璣是第四名權第五衡開陽搖光六七名

北極五星在紫微宮中一名天極一名北辰其紐星天之樞也天運無窮三光迭耀而極星不移故曰居其所而衆星共之第一星主月太子也第二星主日帝王也亦爲太乙之座謂最赤明者也第三星主五星庶子也北極五星最爲尊也中星不明主不用事右星不明太子憂也其第四星爲后宮第五星爲天樞張衡云二星並爲後宮北極五星明大則吉變動則憂抱極樞四星曰四輔所以輔佐北樞而出度受

政也張衡云抱極之細星也爲輔臣之位主贊萬機小而明吉大明及芒角臣逼君暗則官不理天乙一星在紫宮門右星之南天帝之神也主戰鬪知人吉凶者也太乙一星在天乙南相近亦天帝神也主使十六神知風雨水旱兵革飢饉疾疫災害所生之國也張衡云天乙逼閭闔外其占明而有光則陰陽和合萬物成人主吉不然反是太乙占與天乙畧同紫微垣十五星其西蕃七東蕃八在北斗之北一曰紫微大帝之座也天子之常居也主命主度也一曰長垣一曰天營一曰旗星爲藩衛備藩臣也宮闕兵起

旗星直天子出自將宮中兵張衡云紫微垣十五星東藩八西藩七其東藩近閭闔門第一星爲左樞第二星爲上宰第三星爲少宰第四星爲上輔第五星爲少輔第六星爲上衛第七星爲少衛第八星爲少丞其西藩近閭闔門第一星爲右樞第二星爲少尉第三星爲上輔第四星爲少輔第五星爲上衛第六星爲少衛第七星爲少丞皆以明大有常則吉若盛明則內輔盛也宮垣直而明天子將兵開則兵起西藩開如門象名閭闔門有流星自門而出四野者當有中使銜命視其所適野而諭之也陰德二星在紫

微宮內尚書之西主施德者其占以不明爲宜明則新君踐極隋志曰尚書西二星曰陰德陽德主周急振撫又分爲三坐星矣門內東南維五星曰尚書主納言夙夜咨謀龍作納言此之象也張衡曰八座大臣之象其占與四輔不殊極東一星曰柱下史主左右記君之過星明則史直辭不明反是柱史北一星曰女史婦人之微者主傳漏故漢有侍史張衡云婦官也主記宮中之事其占與柱史同御女四星在紫微宮內勾陳之北八十一御妻之象也其占明則多內寵不明則否晉志謂之女御宮天柱五星在紫微

宮門內華蓋杠左旁近東垣北隅法五行主晦朔晝
夜之職明正則吉人安陰陽調不然則司歷過隋志
云建政教立圖法之府也常以朔望日垂禁令於天
柱以示百司周禮以正歲之月示法象魏此之謂也
大理二星在紫微門內次近陰德決獄之官星明則
刑憲平不明則冤酷深勾陳六星在紫微宮華蓋之
下隋志云後宮也大帝之正妃也大帝之常居也張
衡云大帝所居之宮也亦將軍之象也星明則吉暗
則人主惡之勾陳口一星曰天皇大帝其神曰曜魄
寶主御羣靈秉萬機神圖也其星隱而不見則爲災

六甲六星在紫微宮內華蓋杠左傍分掌陰陽紀時
節明則陰陽和不明則寒暑易節五帝內座五星在
華蓋下勾陳上斧辰之象所以備宸居者明正則吉
變動則災凶隋志云客星犯紫微宮中座大臣犯主
華蓋七星其杠九星合十六星在勾陳上正當大帝
所以覆蔽大帝之座也明正則吉傾動則凶傳舍九
星在華蓋上近河賓客之館主胡人入中國客星守
之備姦使亦曰胡兵起內階六星在文昌北天皇之
陛也明吉傾動凶紫微東垣北維外六星曰天厨天
子百官之厨也見吉不見凶八穀八星在紫微西藩

之外五車之北其八星一主稻二主黍三主大麥四
主小麥五主大豆六主小豆七主粟八主麻子明則
八穀皆成暗則不熟一星不見則八穀不登八星不
見則國人糊口天棊五星在女床東北天子先驅所
以禦難也不明則國兵起一曰主爭訟明大凶小吉
天床六星當闔闔門外主天子寢舍解息燕休之處
星正大吉君有慶傾則人主不安一云在宮門外聽
政之象也爲寢舍也暗凶內厨兩星在紫微垣外西
南角主六宮之內飲食府也一云主后夫人與太子
飲宴居常無咎有犯守凶文昌六星在北斗魁前天

之六府也主集計天道一曰上將大將軍建威武次
二曰次將尚書正左右三曰貴相太常理文緒四曰
司祿司中司隸賞功進爵五曰司命司怪太史主滅
咎六曰司寇大理佐理寶所謂一者起北斗魁前近
內階者也明潤大小齊天瑞臻張衡云其占黃潤光
明萬人安大小均天瑞降青黑細微多所害搖動移
徙大臣憂金火守入兵興孛犯國亂一曰文昌動則
三公受誅后崩災福與三公同三公三星在北斗柄
東又三公星在北斗魁西並爲太尉司空司徒之象
主燮理陰陽弼君機務其星移徙不吉居常安金火

守之三公有凶隋志曰杓南三星及魁第一星皆曰三公宣德化調七政和陰陽之官也太尊一星在中台之北貴戚也巫咸云聖公之象居常爲定不見則凶金犯守爲災貴賤將敗者也天牢六星在北斗魁下貴人之牢也主愆過禁暴淫與貫索同占太陽守一星在相西大將大臣之象也主戒不虞設武備也非其常兵起明吉暗凶移徙大臣誅勢四星在太陽西北刑餘人而用事者也不明吉明卽闔官擅權相一星在北斗南隋志曰相者總領百官而掌邦教以佐帝王安邦國集衆事也明吉元戈一星在招搖北

一曰天戈也芒角大而動則四夷兵起其占與梗河相類北斗魁中四黑星爲貴人之牢曰天理明及搖動與有星者爲貴人下獄北斗七星輔一星在太微北七政之樞機陰陽之本元也故運乎天中而臨制四方以建四時而均五行也魁四星爲璇璣杓三星爲玉衡又象號令之主又爲帝車取乎運動之義也又魁第一星曰天樞二曰璇三曰璣四曰權五曰玉衡六曰開陽七曰搖光一至四爲魁五至七爲杓樞爲天璇爲地璣爲人權爲時玉衡爲音開陽爲律搖光爲星石氏云第一曰正星主陽德天子之象也二

曰法星主陰刑女主之位也三日令星主禍害也四
日伐星主天理伐無道五日殺星主中央助四旁殺
有罪六日危星主天倉五穀七日部星亦曰應星主
兵又云一主天二主地三主火四主水五主土六主
木七主金又曰一主秦二主楚三主梁四主吳五主
趙六主燕七主齊輔星附乎開陽所以佐斗成功也
又曰主危正矯不平又曰丞相之象也七政星明則
國昌不明則國殃斗旁欲多星則安斗中少星則人
怨上天下多訟法者無星二十日有輔星明而斗不
明臣強主弱斗明輔不明主強臣弱也杓南三星及

魁第一星皆曰三公宣德化調七政和陰陽之官也
張衡云若廣營宮室妄鑿山陵則第二星不明或變
色若不愛百姓聚興征役則第三星不明或變色若
發號令不明四時不明天道則第四星不明或變色
若廢正樂務淫聲則第五星不明或變色若不勸農
桑不務稼穡峻法濫刑退賢傷政則第六星不明或
變色若不撫四方不安夷夏則第七星不明或變色
凡日月暈連環及斗月暈及搖動兵起其傍側中小
星多則天下不安人多怨一云小星多則天下安不
然則國人散五曜及客星守入皆凶孛彗尤甚也

右夾漈鄭氏作通志天文畧言漢晉諸志所載諸星名數災祥叢雜難舉惟隋丹元子作步天歌句中有圖言下見象或豐或約無餘無失故特取其歌而於歌之後採諸家之言以備之今所載其前則丹元子歌也後則夾漈所取諸志以釋之者也其說亦畧備矣然宋史志所載近代諸儒之說則考訂尤詳故又摭其所未備者附見各段之末云宋兩朝天文志舊說皆以紐星正樞機後祖暅之立儀測之洎皇祐中以銅儀管候之其不動處猶在樞星之末一度餘

八 朱子語錄曰北辰乃天之北極天如水車北辰乃軸處水車動而軸未嘗動 又曰北辰是那中間無星處些子不動是天之樞紐北辰無星緣人要取此爲極不可無箇記認所以就其旁取一小星謂之極星問極星動否曰極星也動只是近那辰後雖動而不覺今人以管去窺那極星見其動來動去只在管裏面不動出去向來人說北極便是北北辰皆只說北極不動至本朝人方去推得是北極只在北辰邊頭而極星依舊動

宋兩朝天文志太子星去北極十五度入心宿三度

宋四輔四星去天樞各四度 勾陳六星去極六度
半入壁宿五度 天皇大帝星去極八度半入室宿
十一度 華蓋七星杠九星距中大星去極二十六
度入婁宿四度 五帝內座五星距中大星去極十
二度半入室宿六度 六甲六星距南星去極十
五度入奎宿四度 御女四星距西南星去極十
三度半入奎宿一度 天柱五星距東南星去極十
三度半入危宿初度 尚書五星距西南星去極一
十九度入尾宿十四度 柱下史一星去極十八度
入斗宿十三度 女史一星去極十七度半入斗宿

二度 陰德二星距東星去極十九度入房宿二度
大理二星距東星去極二十三度半入心宿五度
天床六星距西南星去極二十二度入氏宿二度
半 紫微垣十五星其左驂樞去極二十七度半入
房宿一度 右驂樞去極二十一度入亢宿八度
天乙一星去極二十度半入亢宿一度半 太乙一
星去極二十一度入亢宿一度 內厨二星距西南
星去極十九度半入軫宿十一度 天厨六星距大
星去極二十四度入非宿二十二度 內階六星距
西南星去極二十三度入井宿二十六度 八穀八

星距西南星去極三十一度半入畢宿三度入傅舍
九星距西第四星去極二十八度半入胃宿五度
閣道六星距南星去極四十八度入奎宿四度半
策一星去極三十三度半入壁宿五度二鈞九星距
大星去極二十四度入危宿初度 扶筐七星距南
第一星去極三十二度半入斗宿六度 北斗七星
天樞去極二十三度半入張宿十度搖光去極三十
五度入角宿九度 輔一星去極三十度入角宿三
度 天理四星距東南星去極二十八度入翼宿九
度 三公三星距東星去極三十五度少入角宿六

度 三師三星距西星去極二十一度入張宿初度
半 文昌六星距西南星去極三十四度半入柳宿
二度半 天牢六星距西北星去極二十八度半入
張宿六度 天相一星去極三十三度入軫宿四度
而勢四星去極三十一度入翼宿二度 天槍三星
距大星去極三十二度半入氏宿初度 天棊五星
距南星去極四十四度入箕宿三度

先公曰古今志天文者述天官星之名義大畧皆
同兩朝志亦出入晉隋二史但此能言其去極若
千度某宿若干度爲異耳

宋中興天文志坎正北方也北極不於坎乾而於艮
丑以艮東北萬物之所成終而所成始也作歷者逆
推而上之以至於數千百載必得日月合璧五星連
珠於建牛之次然後用之爲歷元謂建牛艮丑分野
萬物成終成始之地也故北極則居其方爲天之極
而七政則會其分爲歷之元當七政會其分之時亦
必纏運適當其方次天道自然知者鮮矣此其辨之
一曰北極第二星最赤明者星圖謂之帝而勾陳口
中又爲天皇大帝非是按巫咸通元經寶鏡圖北極
五星勾陳六星在紫極宮中柰宮一而帝二也此當

辨曰賈逵張衡蔡邕王蕃陸績皆以紐星爲不動處
晉志謂北辰爲最尊者是也孔子曰譬如北辰居其
所而衆星共之言於天象爲至尊是於五星爲第一
而志反以第五倒置之甚此當辨夫不以紐星之居
其所衆星共者爲帝而以從極之赤明者爲帝則異
乎吾孔子所云此當辨北辰一星不爲帝而指勾陳
口中星爲天皇大帝豈居其所非大而不居其所爲
大乎口中一星卽大帝之座不當遂指爲天皇大帝
遂以爲耀魄寶此當辨志曰北極五星其紐星天之
樞也第一星主月太子也第二星主日帝王也亦太

乙之座謂最赤明者也第三星主五星庶子也非是
按大象列星圖亦以乙爲太子二爲帝王三爲庶子
而餘星則以爲後宮乾象新書所載傳言亦以一主
月爲太子二主日爲帝王而三則以爲主五行四則
以爲主諸王五則以爲主庶子核其說皆非是而未
暇辨所辨者日月五星各分所主而非其義也藉令
必有所主則主者惟帝耳太子何得分主月庶子又
何得分主五星而帝乃獨主日乎此當辨天官書前
漢志及春秋合誠圖曰中宮天極星其一明者太乙
常居旁三星三公或曰子屬後勾四星末大星正如

餘三星後宮之屬也孝經援神契曰辰極橫后妃四
星從端大妃光明二說大畧相類然考之經觀之象
則指三星爲三公固不可而又以三星爲子屬尤不
可且旣以爲三公又以爲子屬何自二其說乎子屬
卽旁二星耳太子一庶子一豈又有子屬乎宮南三
星曰三公內座杓南三星及魁上三星曰三公三孤
後豈此又有三公乎所謂後勾四星勾曲抱極志謂
四輔星也則言末大星正如餘三星後宮之屬者與
言后妃四星從端大妃光明者皆非是此當辨夫以
四輔末大星爲妃者固非是而志則曰勾陳後宮也

大帝之正妃也亦非是勾陳實主六軍大司馬巫咸
曰主天子護軍卽不當以爲後宮又不當以爲正妃
此當辨曰然則北極五星之辨如何聞之師云天樞
紐星在四輔中者是爲天皇大帝其神曰耀魄寶此
是也而彼所指勾陳中一星爲耀魄寶者非也故初
一曰帝次二曰后次三曰妃次四曰太子乃其赤明
者也次五曰庶子因知中宮帝當以孔子所稱北辰
爲據其精北極星其神耀魄寶太公望閱天書不誣
此其辨之二次也

又曰極星之在紫垣萬神所宗七曜三垣二十八宿

衆星所拱是北極爲天文之正中一而自唐以來歷家
以儀象考測則中國南北極之正實去極星之北一
度有半此蓋中原地勢之度數也

中興更造渾儀而太史局令丁師仁言臨安府地勢
向南於北辰極高下當量行移易局官呂粲言渾天
無量行更易之制若用於臨安與天參合移之他往
必有差忒於此罷議後十餘年邵諤鑄儀則果用臨
安北極高下爲之以今清臺儀校之實去極星四度
有奇焉若列星諸宿去極之度數與赤道之遠近則
清臺一遵皇祐所測無所更易舊史已具茲不復言

太微宮一數星無流無滅更長壽史曰具於不感言
上元太微宮昭昭列象在蒼穹端門只是門之中左右
執法門西東門首皂衣一謁者以次卽是烏三公三黑
九卿公背傍五黑諸侯卿後行四箇門西主軒屏五帝
內座於中正幸臣太子并從官烏列帝後從東定郎將
虎賁居左右常陳郎位居其後常陳七星不相誤郎位
陳東一十五兩面宮垣十星布左右執法是其數宮外
明堂布政宮三箇靈臺候雲雨少微四星西南隅長垣
雙雙微西居北門西外接三台與垣相對無兵災
太微垣十星在翼軫北張衡云天子之宮庭五帝之

連十二諸侯府也其外蕃九卿也一曰軒轅爲權太
微爲衡衡主平也隋志云又爲天庭理法平辭監升
授德列宿受符諸神考節舒情稽疑也南蕃中二星
間曰端門東曰左執法廷尉之象也西曰右執法御
史大夫之象也執法所以舉刺凶奸者也左執法之
東左掖門也右執法之西右掖門也東蕃四星南第
一曰上相其北東太陽門也第二星曰次相其北中
華東門也第三星曰次將其北東太陰門也第四星
曰上將所謂四輔也西蕃四星南第一星曰上將其
北西太陽門也第二星曰次將其北中華西門也第

三星曰次相其北西太陰門也第四星曰上相亦四輔也東西蕃有芒及動搖者諸侯謀天子也執法移則刑罰尤急月五星入太微軌道吉其所犯中座成刑謁者一星在太微內在執法東北主贊賓客也不見外國不賓服謁者東北三星曰三公內座朝會之所居也張衡云以輔弼帝者其名與夾斗三公同三公北三星曰九卿內座主治萬事與天紀同占九卿西五星曰內五諸侯內侍天子不之國也辟雍之禮得則太微諸侯明屏四星在端門內帝座南近右執法屏所以擁蔽帝庭也執法主刺舉星明潤則君臣

有禮黃帝內座一星在太微中含樞紐之神也天子動得天度止得地意從容中道則太微五帝之座明以光黃帝座不明人主當求賢士以輔治不然則奪勢又曰太微五帝座小弱青黑天子國亡四帝內座四星夾黃帝座東方星蒼帝靈威仰之神也南方星赤帝赤熛怒之神也西方星白帝白招矩之神也北方星黑帝叶光紀之神也張衡云五帝同明而光則天下歸心不然則失位金火水入太微若順人軌道伺其出之所守之分則爲天子所誅也帝座東北一星曰幸臣主親愛臣明則幸臣用事微細吉太子一

星在幸臣西五帝座北儲貳之星明而潤則太子賢不然則否金火守入太子不廢則爲篡逆之事從官一星在太子西北主從官不見則帝不安如常則吉郎將一星在郎位東北所以爲武衛張衡云今左右中郎將是也大明芒角將恐不可當也虎賁一星在太微西蕃之外上相之西下台之南靜室旄頭之騎官也張衡云主侍從之武臣也與車騎同占常陳七星如畢狀在郎位北天子宿衛虎賁之士以設強毅也星搖動天子自出明則武兵用微則兵弱郎位十五星又云二十四星在帝座東北一曰依烏郎位也

周官之元士漢官之光祿中散騎諫議郎三署郎中是其職也張衡云今之尚書郎也欲其大小相均光潤有常吉隋志郎位主守衛也其星明大臣有劫主又曰客犯上其星不具后死幸臣誅客星入之大臣爲亂明堂三星在太微西南角外天子布政之宮也明吉暗凶明堂西三星曰靈臺主觀雲物察符瑞候災變也占與司怪同少微長垣二座星已釋在張星之次矣三台六星兩兩而居起文昌列招搖太微一曰天柱三公之位也在天曰三台主開德宣符也西近文昌二星曰上台爲司命主壽次二星對軒轅

曰中台爲司中主宗室東二星抵太微曰下台爲司
祿主兵所以昭德塞違也又曰三台爲天階太乙躡
以上下一曰泰階上階上星爲天子下星爲女主中
階上星爲諸侯三公下星爲卿大夫下階上星爲士
下星爲庶人所以和陰陽而理萬物也其星有變各
以所主占之君臣和集如其常度張衡云色齊明而
行列相類則君臣和法令平不齊爲乖度金火守入
兵起彗孛尤甚也

宋兩朝天文志太微十星右執法去極八十四度入
翼宿十二度半左執法去極八十六度入軫宿初度

半 謁者一星去極八十三度入軫宿一度
三星距東星去極八十四度半入軫六度
星距西北星去極七十五度入軫七度
五星距西星去極七十度入軫一度
距中大星去極七十一度半入翼十一度
距西南星去極八十度入翼十度
六十六度半入翼十一度半
四度半入翼八度半
入翼十五度星郎位十五星距西南星去極六十度
入翼十八度星郎將一星去極四十七度半入軫十

六度十常陳七星距東星去極五十一度半入軫初
度與虎賁一星去極六十三度少入翼二度六十與
宋中興天文志曰太微垣有五帝座五帝內座又列
乎紫宮何也曰五帝常居在太微而入覲乎紫宮故
有內座也然則五帝何帝也此志所謂靈威仰赤熛
怒含樞紐白招矩叶光紀之神也有天皇矣而又有
五帝何也五帝在天主五行在地主五嶽分方主事
以輔天皇者昔周公郊祀后稷以配天斯北極紫微
中宮天皇大帝也而宗祀文王於明堂以配上帝則
宮南太微五帝也此月令明堂所以分五宮祀五帝

也

天市垣星宮天市垣南門之內天主

下元一宮名天市兩扇垣牆三十二當門六角黑市樓
門左兩星是車肆兩箇宗正四宗人宗星一雙亦依次
帛度兩星屠肆前候星還在帝座邊帝座一星常光明
四箇微茫宦者星以次兩星名列肆斗斛帝前依其次
斗是五星斛是四垣北九箇貫索星索口橫者七公成
天紀恰似七公形數著分明多兩星紀北三星名女牀
此座還依織女傍三光之象無相侵二十八宿隨其陰
水火木土并與金以次別有五行吟

天市垣二十二星在房心東北主權衡主聚衆一日
並天旗庭主斬戮之事也市中星衆潤澤則歲實星希
天則歲虛熒惑守之戮不忠之臣又曰若怒角守之者
臣殺主彗星出爲徙市易都客星入之兵大起出之
有貴喪張衡云天市明則市利隱商人無利忽暗則
反是市樓六星在市中臨箕星之上主司闡闡明則
吉暗則市利不理也隋志市樓者市府也主市價律
下度其陽爲金錢其陰爲珠玉變見各以所主占之車
天肆二星在天市垣南門之內主車駕不明則國車盡
行隋志主衆賈之區宗正二星在帝座東南宗大夫

也彗星守之若失色宗正有事客星守動則天子親
屬有變又曰客星守之貴人死又曰宗正明則宗室
有秩暗則國家凶宗人四星在宗正東主錄親疎享
祀如綺而明正族人有序宗星二星在宗人東北候
星之東宗室之象帝輔血脉之臣也客星守之宗人
不和帛度二星在宗室星東北主度量明則尺量平
商人不欺暗則否屠肆二星在帛度東北主烹宰明
大則肆中多宰殺候一星在帝座東北主伺陰陽也
明大則輔臣強四夷開候細微則國安亡則主失位
移則主不安居常則吉帝座一星在天市中候星西

天庭也光而潤則天子吉威令行微細凶大人當之
或云暗則大人不正張衡云帝座者帝王之座帝座
有五一座在紫微宮一座在大角一座在心中一座
在天市垣一座在太微宮咸云帝座一曰神農所居
不見則大人當其咎宦者四星在帝座西南帝傍之
闡人也星微則吉明則凶非其常宦者有憂其占與
勢星同列肆二星在斛西北主寶玉之貨移徙則列
肆不安火守入兵大起斗五星在宦者西南主平量
覆則歲熟仰則大飢明暗與帛度同斛四星在市樓
北亦曰天斛主量者也占與斗同貫索九星在七公

前一曰連索一曰連營一曰天牢主法律禁暴強也
牢一星爲門欲其開也九星皆明天下獄煩七星
見小赦五星見大赦動則斧鑕用中空則更元漢志
云十五星張衡云貫索開有赦不見則刑獄簡若閉
口及星入牢中有繫死者常以午子夜候之一星不
見則有小喜二星不見賜祿三星不見人主德令行
且赦若客星出視其小大大有大赦小有小赦或云
貫索爲賤人之牢一星芒有喜事二星芒賜爵祿三
星芒有赦門閉牢中多死水犯災火犯米貴七公七
星在招搖東天之相也三公之象張衡云七公橫列

貫索之口主執法列善惡之官也星齊正則國法平
差戾則獄多冤酷或云星入河米貴火犯之兵起天
紀九星在貫索東九卿也爲九河主萬事之紀理冤
訟也明則天下多詞訟亡則政理壞國紀亂散絕則
地震山崩女床三星在天紀之北爲後宮御女主女
事明則宮人恣意常則無咎以千一列各十一星不
宋兩朝天文志天市垣二十二星東西列各十一星
一其東垣南第一星曰宋第二星曰南海第三星曰燕
第四星曰東海第五星曰徐第六星曰吳越第七星
曰齊第八星曰中山第九星曰九河第十星曰趙第

十一星曰魏其西垣第一星曰韓第二星曰楚第三
星曰梁第四星曰巴第五星曰蜀第六星曰秦第七
星曰周第八星曰鄭第九星曰晉第十星曰河間第
十一星曰河中東垣南第一星宋去極一百五度
半入危宿七度西垣第一星韓去極九十八度半
入心宿五度入市樓一星距東南星去極九十八度
入尾宿十二度十車肆二星距西大星去極一百度
入尾宿三度斛四星距西南星去極八十七度半
入尾宿三度列肆二星距東星去極八十六度入
心宿三度半帝座一星去極七十五度入尾十度

候二星去極七十八度半入尾十六度入宦者四星距南星去極七十六度半入尾九度半斗五星距東大星去極七十九度入尾六度半入宗正二星距北星去極八十五度半入尾十六度去宗人四星距大星去極八十度半入箕五度星宗室二星距北大星去極八十度半入箕五度星帛度二星距西星去極六十九度少入箕三度一屠肆二星距西星去極六十八度半入箕宿三度

宋中興天文志天市垣中一星明大者謂之帝座帝座東北一星爲后舊誤作候西南三星爲妃舊失其

位妃北一星在帝右后北一星在帝左是爲左右常侍妃南四星爲宦寺宦寺南一星爲閹人閹人南四星爲內屏此其別也而舊乃以右常侍一星及妃三星爲宦者又以宦寺閹人合五星爲斗又以內屏四星爲斛皆誤也

又曰凡三垣紫宮在中天市在紫宮之東北太微在紫宮之東南而大角在紫宮之正東故天市在大角左太微在大角右大角一星晉隋志雜之衆星中謂之天王座其說不同司馬遷云大角者天王帝廷其兩旁各有三星鼎足勾之曰攝提攝提者直斗柄所

指以建時節故曰攝提格雖於衆星中頗表而出之亦未爲得也故凡曰天王座曰天王帝廷曰直斗柄所指以建時節皆非是

文獻通考卷第二百七十八

鄱 陽 馬 端 臨 貴 與 著

文獻通考卷第二百七十九

象緯考二

二十八宿

東方蒼龍七宿

宋中興天文志石氏云東宮青帝其精蒼龍爲七宿其象有角有亢有氐有房有心有尾有箕氏胸房腹箕所糞也司春司木司東嶽司東方司鱗蟲三百有六十蒼龍爲鱗蟲之長角兩星南北正直著中有平道上天田總是黑星兩相

連別有一鳥名進賢平道右畔獨淵然最上三星周鼎形角下天門右平星雙雙橫於庫樓上庫樓十星屈曲明樓中柱有十五星三三相著如鼎形其中四星別名衡南門樓外兩星橫

角二星十二度爲主造化萬物布君之威信謂之天關其間天門也其內天庭也故黃道經其中七曜之所行也其明則太平芒動則國不寧日食右角國不寧月食左角天下道斷金火犯有戰敵金守之大將持政左角爲天田爲理主刑其南爲太陽道五星犯之爲旱右角爲將主兵其北爲太陰道五星犯之爲

水蓋天之三門猶房之四表也左右角間二星曰平道爲天子八達之衢明正則吉動搖則法駕有虞天田主天子畿內封疆金守之主兵火守之主旱水守之主潦平道西一星曰進賢在太微宮東明則賢者在位暗則在野又曰主卿相主逸才周鼎三星在攝提西國之神器也不見或移徙則運祚不寧天門二黑星在平星北角之南主天之門爲朝聘待客之所明則四方歸化不見則兵革起邪佞生平星二星在庫樓北平天下之法獄廷尉之象也庫樓十星其六大星爲庫南四星爲樓在角南一曰天庫兵車之府

也旁十五星三三而聚者柱也中央四小星衡也主
陳兵其占曰庫中星不見兵四合無星則下臣謀上
明而動搖則兵出四方盡不見則國無君庫樓東北
二星曰陽門主守隘塞也南門二星在庫樓南天之
外門也主守兵明則遠方入貢暗則夷狄畔客星守
之主兵至

宋兩朝天文志角二星距南星去極九十七度半
庫樓二星距西北星去極一百二十三度入軫十五
度半南門二星距西星去極一百三十七度入軫
十一度平道二星距東星去極九十一度入角二

度天門二星距西星去極一百四度半入軫十六
度平星二星距西星去極一百九度半入軫十六
度天田二星距西星去極八十二度半入角二度
半周鼎二星距東北星去極六十四度半入角宿
七度半

亢四星恰似彎弓狀大角一星直上明折威七箇亢下
橫大角左右攝提星三三相似如鼎形折威下左頓頑
星兩箇斜安黃色精頑西二星號陽門色若頓頑直下
存

亢四星九度日月之中道主天子內朝天下之禮法

也又曰總攝天下奏事聽訟理獄錄功者也亦爲疏
廟主疾疫其星明大四海歸王輔臣納忠人無疾疫
移動多病不見則天下鼎沸而旱澇作矣大角一星
在攝提間天王坐也又爲天子梁棟金守之則兵起
日食主凶亢南七黑星曰折威主斬殺金火守之夷
狄犯邊將有棄市者攝提六星直斗柄之南主建時
節伺機祥攝提爲盾以夾擁帝坐也主九卿明大三
公恣橫客星入之聖人受制一曰大臣之象頓頑二
星在折威東南主考囚察情僞也陽門在庫樓東北
主邊塞險阻之地客星出陽門夷狄犯邊

宋兩朝天文志亢四星距南第二星去極九十六度
攝提六星其右距北大星去極六十七度入亢七
度其左距南星去極七十二度半入亢七度 太陽
門二星距西星去極一百一十三度入角十度 折
威七星距西第三大星去極一百三度入亢三度
大角二星去極六十六度入亢二度半 頓頑二星
距東南星去極一百一十二度半入亢四度

氏四星似斗側量米天乳氏上黑一星世人不識稱無
名一箇招搖梗河上梗河橫列三星狀帝席三黑河之
西亢池六星近攝提氏下衆星騎官出騎官之衆二十

七三三相連十欠一陣車氏下騎官次騎官下三車騎位天輻兩星在陣傍將軍陣裏振威霜

氏十六度下二尺爲五星日月中道爲天子之路寢明則大臣妃后奉君不失節如不見或移動則臣將謀內禍亂生矣日月食主內亂木犯之立妃后火犯臣僭上金犯拜將水犯百官憂客星犯婚禮不整彗孛犯暴兵起月暈人不安一曰氏爲后妃之府休解之房前二星適也後二星妾也將有徭役之事氏先動星明大則民無勞天乳在氏北主甘露明則潤澤甘露降招搖一星在梗河北次北斗柄端主胡兵芒

角變色搖動則兵革大起梗河二星在大角北天子以備不虞其色變動有兵喪帝席三星在大角西北天子燕樂獻壽之所其星不見大人失位亢池六黑星爲泛舟楫主迎送移徙則凶騎官二十七星在氏南天子騎士之象星衆則安不見兵起車騎三黑星在氏西騎官之上都車騎之將也金火犯爲災動搖車騎行天輻兩黃星在房西主鸞駕客星來守之則輦轂有憂也騎陣將軍一星在騎官東南主騎將也搖動則騎將出

宋兩朝天文志氏四星距西南星去極一百四度半

亢池六星距北大星去極七十度半入亢三度
天乳一星去極九十二度入氐十四度 招搖一星
去極五十一度入亢四度半 梗河三星距大星去
極五十九度入氐二度 騎官二十七星距西北星
去極一百二十度入氐宿初度 車騎三星距東南
星去極一百四十度入氐二度 帝席三星距東星
去極六十七度半入氐宿一度半
房四星直下主明堂鍵閉一黃斜向上鈎鈐兩箇近其
傍罰有三星直鍵上兩咸夾罰似房狀房下六星號爲
日從官兩箇日下出

房六度爲明堂天子布政之宮也亦四輔也下第四
星上將也次次將也次次相也上星上相也南二星
君位北二星大人位又爲四表中間爲天衢之大道
亦謂之天關黃道之所經也南間曰陽道亦曰陽道
其南曰太陽北間曰陰間亦曰陰道其北曰太陰七
曜由乎天衢則天下平和由陽道則主早喪由陰道
則主水兵房星亦曰天駟爲天馬主車駕南星曰左
驂次左服次右服次右驂亦曰天廐又主開閉爲蓄
藏之所由也房星明則王者明驂星大則兵起星離
則人流日月食主昏亂權臣橫彗孛犯之兵起下二

星爲陰五星犯之爲水上二星爲陽五星犯之爲旱
房北二小星曰鈎鈐房之鈐鍵天之管籥主閉藏鍵
天心也王者孝則鈎鈐明近房天下同心遠則天下
不和王者絕後房鈎鈐間有星及疎拆則地動河清
東咸西咸各四星在房星北日月五星之道也爲房
之戶所以防淫佚也明則吉暗則凶日月五星犯守
之有陰謀火守之兵起罰三星在東咸正西南北而
列主受金贖罪正而列則法令太平曲而斜行則刑
罰不中日一星在房中道前太陽之精主明德金火
犯守之有憂從官二星在積卒西北

宋兩朝天文志房四星距南第二星去極一百一十
四度半 鍵閉一星去極一百八度入房四度 罰
三星距南星去極一百八度入心一度半 東咸四
星距西南星去極一百一十一度入心一度 日一
星去極一百一十三度入氏十四度半 從官二星
距西星去極一百二十二度入氏十四度 西咸四
星距西南星去極一百四度半入氏十五度 鈎鈐
二小星去極一百九度半入房二度半

中興天文志甘氏云日一星在房之西氏之東日者
陽宗之精也爲雞三足爲烏二足雞在日中而烏之

精爲星以司太陽之行度日生於東故於是在焉
心三星中央色最深下有積卒共十二三三相聚心下
是

心六度一名大火天王位也中星曰明堂爲大辰天
子之正位也前星爲太子不明則太子不得位後星
爲庶子明則庶子繼心上四尺爲日月五星之中道
中心明則化成道昌直則地動移徙不見國亡又曰
心變黑色夫人有憂直則王失勢動則國有憂離則
民流金火犯血光不止土木犯及日月食不吉月暈
兵起火來守之國無主客星及孛犯天下兵荒積卒

十二星在房心西南五營軍士也微而小則吉明大
搖動兵大起一星亡兵出二星亡兵半出三星亡兵
出盡他星守之兵大起近臣誅

宋兩朝志心三星距西前星去極一百一十四度半
積卒十二星距大星去極一百二十六度半入氐
宿十五度

尾九星如鈎蒼龍尾下頭五點號龜星尾上天江四橫
是尾東一箇名傳說傳說東畔一魚子龜西一室是神
宮所以列在后妃中

尾十九度后妃之府後宮之場也北之一丈爲天之

中道上第一星后也次三星夫人次則嬪妾第三星
傍一星名曰神宮解衣之內室尾亦爲九子星色欲
景均明大小相承則后妃無妬忌後宮有敘多子孫星
微細暗后有憂疾疎遠則后失勢動移則君臣不和
天下亂就聚則大水木犯之及月暈則后妃死火犯
宮中內亂土犯吉水犯之中有事客星犯大臣誅日
月食主饑一曰金火守之後宮兵起龜五星在尾南
漢中主占定吉凶明則君臣和不明則爲乖戾亡則
赤地千里火守之兵起在外守之兵罷天江四星在
尾之北主太陰不欲明明而動水暴出參差則馬貴

其星不具則津河關道不通熒惑守之有立主客星
入河津絕傳說一星在尾後河中主後宮女巫祝祀
神靈祈禱子孕故曰主王后之內祭祀以求子孫詩
云克禋克祀以弗無子此之象也其星明大王者多
子孫小而暗後宮少子動搖則後宮不安星搖則天
子無嗣魚一星在尾後河中主陰事知雲雨之期也
大明則陰陽和風雨時暗則魚多亡動搖則大水暴
出漢中則大魚多死火守在南則早在北則水起
宋兩朝天文志尾九星去極一百二十七度半 龜
五星距南第二星去極一百一十四度半入尾宿十

度 魚一星去極一百二十六度入尾宿十五度半
傳說一星去極一百八度半入尾宿十四度

中興天文志石氏云傳說者章祝女巫官一名太祝
司天王之內祭祀以祈子孫故有太祝以傳說於神
宮或讀傳爲傳遂謂之殷相說自莊周妄言

夾漈鄭氏曰按傳說一星惟主後宮女巫禱祠求
子之事謂之傳說者古有傳母有保母傳而說者
謂傳母喜之也今之婦人求子皆祀婆神此傳說
之義也偶商之傳說與此同音諸子家更不詳審
其義則曰傳說騎箕尾而去殊不知箕尾專主後

宮之事故有傳說之佐焉

按傳說商之良宰輔也而其星則所主者宮中禱
祠以祈子孫其事不類故先儒疑之然諸星中所
謂軒轅社稷造父奚仲王良皆古人之名也蓋在
天爲星辰在人爲聖賢於理有之今疑其不類而
改以爲傳說則過矣

箕四星形狀如簸箕箕下三星名木杵箕前一黑是糠
皮

箕十一度亦謂之天津後宮妃后之位上六尺爲天
之中道箕一曰天雞主八風凡日月宿在箕東壁翼

軫者風起又主口舌主客蠻夷胡貊故蠻夷將動先
表箕焉星大明直則五穀熟君無讒間疎暗則無君
世亂五穀貴蠻夷不伏內外有差就聚細微天下憂
動則蠻夷有使來離徙則人流若移入河國災人相
食月暈金火犯之兵起流星犯大臣叛日宿其野風
起杵三星在箕南主杵曰之用也縱爲豐橫爲饑移
徙人失業不見人相食客星入杵曰天下有急變糠
一星在箕口前杵曰西北明則爲豐暗爲饑不見人
相食

宋兩朝天文志箕四星距西北星去極一百二十一

度半 杵三星距中心大星去極一百三十八度入
箕宿三度 糠一星去極一百一十七度入尾宿十
七度半

北方 元武七宿

宋中興志石氏云北方黑帝其精元武爲七宿斗有
龜蛇蟠結之象牛蛇象女龜象虛危室壁皆龜蛇蟠
蚪之象司冬司水司北嶽司北方司介蟲三百有六
十王奕曰龜不獨介蟲之長也北冬令其氣蟄藏有
縮藏之象焉

斗六星其狀似北斗魁上建星三相對天弁建上三三

九斗不圓安十四星雖然名鼈貫索形天雞建背雙黑
星天籥柄前八黃精狗國四方雞下生天淵十星鼈東
邊更有兩狗斗魁前農家丈人狗下眠天淵十黃狗色
元

斗二十五度天廟也亦曰天機五星貫中日月正道
爲丞相太宰之位酌量政事之宜褒進賢良稟授爵
祿又主兵南二星魁天梁也中央二星天相也北二
星杓天府廷也亦爲壽命之期將有天子之事占於
南斗星盛明君臣一心天下和平爵祿行芒角動搖
天子愁兵起移徙其臣逐日月五星逆入斗天下流

蕩孛犯之兵起星小暗則廢宰相及死鼈十四星在
南斗南鼈爲水蟲歸太陰有星守之白衣會主有水
火守之早建六星在斗背亦曰天旗臨於黃道天之
都關也建斗之間七曜之道建爲謀事爲天鼓爲天
馬南二星天庫也中央二星市也鈇鑽也上二星旗
跗也建動搖則人勞月暈之蛟龍見牛馬疫月食五
星犯守大臣相譖臣謀主亦爲關梁不通有大水天
弁九星在建星北入河市官之長也主列肆闐闐若
市籍之事以知市珍也星明則吉彗星犯守之糴貴
兵起天雞二星在狗國北主候時也金火守入兵大

起天籥八星在斗南斗杓西主鎖籥關閉明吉暗凶
狗國四星在建東北主鮮卑烏丸沃沮明則邊寇作
金火犯守外夷有變太白逆守其國亂客星守犯之
有大盜其王且來天淵十星在鶩東南一日天海主
漑灌火守之大旱水守之大水一日主海中魚鶩狗
二黑星在斗魁前主吠守防奸回也不居常處爲大
災農丈人一星在南斗西南老農主稼穡也其占與
糠略同

宋兩朝志南斗六星距西第三星去極一百一十九
度 鶩十四星距東大星去極一百三十度入斗五

度 天弁九星距西大星去極九十九度半入斗宿
初度 建六星距西星去極一百一十三度入斗宿
四度 天籥八星距西大星去極一百一十四度半
入尾宿十九度 狗二星距東大星去極一百一十
八度入斗宿十二度 天淵十星距中北星去極一
百二十九度入斗宿十七度 天雞二星距西星去
極一百一十度入斗宿十六度半 狗國四星距西
北星去極一百二十度入斗宿十八度 農丈人一
星去極一百二十四度半入箕宿六度半
牛六星近在河岸頭頭上雖然有兩角腹下從來欠一

脚牛下九黑是天田田下三三九坎連牛上直建三河
鼓鼓上三星號織女左旗右旗各九星河鼓兩畔左邊
明更有四黃名天桴河鼓直下知連珠羅堰三烏牛東
居漸臺四星似口形輦道東足連五丁輦道漸臺在河
許欲得見時近織女

牛七度天之關梁日月五星之中道主犧牲其北二
星一曰卽路二曰聚火又曰上一星主道路次二星
主關梁次三星主南越甘氏曰上二星主道路次二
星主關梁次二星主南夷中一星主牛移動則牛多
殃明大則王道昌其星曲則糴貴又曰星明大則關

梁通牛貴怒則馬貴不明失常穀不登細則牛賤中
星移上下牛多死小星亡則牛多疫月暈損犢金火
犯之兵災水土犯之吉天田九星牽牛南太微東主
天子畿內之田其占與角之天田同九坎九黑星在
天田東主溝渠所以導達泉源流瀉盈溢明盛則有
災夷狄侵邊不明則吉河鼓三星在牽牛北天鼓也
主軍鼓及鈇鉞一曰三武主天子三將軍中央大星
爲大將軍左星爲左將軍右星爲右將軍左星南星
也所以備關梁設險阻而拒難也明大光潤將軍吉
動搖差度亂兵起直則將有功曲則將失律右旗左

旗各九星在河鼓左右皆天之旗鼓也旗星明潤將軍吉動搖兵起怒則馬貴旗端四星南北列曰天桴鼓桴也星不明漏刻失時動搖軍鼓用桴鼓相直亦然織女三星在河北天紀東端天女也生果蘇絲綿寶玉也王者至孝神祇咸喜則織女星俱明天下和平大星怒角布帛貴又曰三星俱明女功善暗而微天下女功廢不見兵起東足四星曰漸臺臨水之臺也主漏刻律呂之事西足五星曰輦道天子嬉遊之道金火守之御路兵起羅堰三星在牽牛東主堤塘壅蓄水潦灌溉田苗大而明大水泛濫

宋兩朝天文志牛六星距中央大星去極一百八度半天田九星距西北星去極一百一十六度半入斗宿二十二度九坎九星距大星去極一百四十一度半入斗宿二十五度左旗九星距西第四大星去極七十三度半入斗宿二十四度天桴四星距大星去極九十四度入斗宿二十四度半羅堰三星距北星去極一百九度入牛宿四度漸臺四星距東南星去極五十八度入斗宿十度輦道五星距西北星去極四十七度半入斗宿十一度半織女三星距大星去極五十二度半入斗宿五度

夾漈鄭氏曰按張衡云牽牛織女七月七日相見者卽此也古雅云河鼓謂之牽牛又歌曰東飛百勞西飛燕黃姑織女時相見黃姑卽河鼓也音訛耳
容齋洪氏隨筆曰宋蒼梧王當七夕夜令楊玉夫伺織女渡河曰見當報我不見當殺汝錢希白洞微志載蘇德哥爲徐肇祀其先人曰當夜半可以蓋候鬼宿渡河之後翟公巽作祭儀十卷云或祭於春或祭於旦皆非是當以鬼宿渡河爲候而鬼宿渡河常在中夜必使仰占以候之葉少蘊云公

巽博學多聞援證皆有据不肯碌碌同衆所見必過人予按天下經星終古不動鬼宿隨天西行春昏見於南夏晨見於東秋夜半見於東冬昏見於東安有所謂渡河及常在中夜之理織女昏晨與鬼宿正相反其理則同蒼梧王荒悖小兒不足笑錢翟葉三公皆名儒碩學亦不深考如此杜詩云牛女漫愁思秋期猶渡河牛女年年渡何曾風浪生梁劉孝儀詩云欲待黃昏至含嬌淺渡河唐人七夕詩皆有此說此自是牽俗遣詞之過故杜老又有詩云牽牛出河西織女處其東萬古永相望

七夕誰見同神光竟難候此事終朦朧蓋自洞曉
其實非他人比也

女四星如箕主嫁娶十二諸國在下陳先從越國向東
論東西兩周次二秦雍州南下雙鴈門代國向西一晉
伸韓魏各一皆北輪楚之一國魏西屯楚城南畔獨燕
軍燕西一郡是齊鄰齊北兩邑平原君欲知鄭在越下
存十六黃星細區分五箇離珠女上星敗瓜珠上瓠瓜
生兩箇各五瓠瓜明天津九箇彈弓形兩星入牛河中
橫四箇奚仲天津上七箇仲側扶筐星

女十一度下九尺爲日月中道天之少府也謂之須

女者須賤妾之稱婦職之卑者也主婦女之位其星
如婦功之式主布帛裁製嫁娶星明天下豐女功昌
小暗則國藏虛移動則婦女受殃產死者多后妃廢
日月食國憂木犯立后火犯女喪金犯災土孛犯損
蠶月暈婦人災又曰水守之萬物不成火守之布帛
貴人多死土守之有女喪金守之兵起十二國有十
六星齊一星在九坎之東齊北二星曰趙趙北一星
曰鄭鄭北一星曰越越東二星曰周周東南北列二
星曰秦秦南二星曰代代西一星曰晉晉北一星曰
韓韓北一星曰魏魏西一星曰楚楚南一星曰燕其

星有變各以其國離珠五星在須女北須女之藏府也爲女子之星非其故後宮亂客星犯之後宮凶瓠瓜五星在離珠北主陰謀主後宮主果食明則歲熟微則后失勢瓜果不登客星守之魚鹽貴旁五星曰敗瓜主種與瓠瓜略同天津九星在虛危北橫漢中津梁所度明而動則兵起如流沙死人如亂麻參差不齊馬貴一星不備關梁不通三星不備覆陷天下星亡水災河溢水賊稱王奚仲四星在天津北古車正也金火守之兵車必起扶筐七黑星主蠶事見吉不見凶

宋兩朝天文志女四星距西南星去極一百四度半
十二諸侯十六星其趙距西星去極一百二十三度入牛宿四度 離珠五星距東北大星去極九十五度入牛宿六度半 敗瓜五星距南星去極八十二度半入牛宿六度 瓠瓜五星距西星去極七十九度入牛宿七度 天津九星距西宿星去極四十七度半入斗宿二十三度 奚仲四星距西北星去極三十八度入牛宿十八度

宋中興天文志石氏云女一名婺女左傳昭公十年有星出於婺女杜預注婺女爲旣嫁之女織女爲處

女也

夾漈鄭氏曰謹按天之所覆者廣而華夏所占者
牛女下十二國耳牛女在東南故釋氏謂華夏爲
南贍部州其二十八宿所管者多十二國之分野
隨其隸耳

按鄭氏因牛女間有十二國星而以爲華夏所占
者只牛女二宿且引釋氏南贍部州說以爲證然
以十二次言之牛女雖屬揚州而華夏之地所謂
十二國者則不特揚州而已又揚州雖可言東南
而牛女在天則北方宿也與南贍部州之說異矣

且北斗七星其次舍自張而至於角星書以爲一

主秦二十主楚三主梁四主吳五主趙六主燕七主

齊五車五星其次舍在畢星書以爲西北一星主

秦東北一星主趙燕東南一星主魯衛中央一星

主楚西南一星主魏然則北斗五車所主者亦此

十二國而此二星初未嘗屬乎牛女也謂牛女專

主華夏可乎

虛上下各一如連珠命祿危非虛上呈虛危之下哭泣
星哭泣雙雙下壘城天壘圓團十三星敗白四星城下
橫白西三箇離瑜明

虛九度少彘宰之官也主邑居廟堂祭祀之事又
主風雲死喪下九尺爲天之中道明靜則天下安動
搖則有死喪哭泣日月食兵起流星犯賊亂宗廟五
星犯有災虛北二星曰司命主舉過行罰滅不祥又
北二星曰司祿主爵祿增年延德故在六宗之祀司
危二星在司祿之北主驕佚司非二星在危之北主
愆過凡此四司皆黑星明大爲災居常則平虛南二
星曰哭主號哭也哭東二星曰泣主死明則國多哭
泣金火守之亦然泣南十三星曰天壘城如貫索形
主北夷丁零匈奴敗曰四星在虛危南知凶災他星

守之饑兵起秦代東三星南北列曰離瑜離圭衣也
瑜玉飾皆婦人之服星也微則後宮儉約明大則婦
人奢

宋兩朝天文志虛二星距南星去極一百度半 司
命二星距西星去極九十二度入虛宿三度 司祿
二星距西星去極九十度入虛宿四度 司危二星
距西星去極八十五度半入女宿八度 司非二星
距西星去極七十九度半入女宿九度半 哭二星
距西星去極一百一十七度半入女宿九度 泣二
星距南星去極一百四度半入危宿三度 天壘城

十三星距西星去極一百二十六度入女宿十一度
敗白四星距北星去極一百三十九度半入虛宿
八度 離瑜三星距西星去極一百二十八度入女
宿九度

危三星不直舊先知危上五黑號人星人下三四杵白
形人上七烏號車府府上天鈞九黃晶鈞上五鷓字造
父危下四星號墳墓墓下四星斜虛梁十箇天錢梁下
黃墓傍兩星能蓋屋身著黑衣危下宿

危十六度主天府天庫架屋甘氏云爲天市廟堂下
九尺爲天之中道主架屋受藏風雨墓墳祠祀如動

則天下大動土功張衡云虛危等爲死喪哭泣之事
亦爲邑邑廟堂祠祀之事冢宰之官動則死喪哭泣
火守則天子將兵金守則饑饉兵起虛危動則有土
功火守則兵起水守則下謀上一云危動則不明土
功兵革起月暈日月五星犯卽有災車府東南五黑
星曰人星有如人象主靜衆庶柔遠能邇一曰卧星
主防淫不見則人有詐行詔書明則人安暗凶內杵
三星在人星傍主軍糧正直下曰吉不相當糧絕不
直民饑內曰四星在人星東南主春曰覆則大饑仰
則大豐隋志云客星入杵曰兵起天下聚米天津東

南七星曰車府東近河邊抵司非主官車之府金火
守之兵車大動天鈞九星如鈞狀在造父西河中主
乘輦服飾法式直則地將動明則服飾正也傳舍南
河中五星曰造父御官也一曰司馬或曰伯樂星亡
馬大貴明則吉墳墓四星在危下如墓形主喪葬之
事明則多死亡虛梁四星在蓋屋南主園陵寢廟非
人所處故曰虛梁金火守入犯兵災大起天錢十星
在北落西北主錢帛所聚占明則府藏盈不爾虛耗
金火守之兵盜起蓋屋二星在危南主天子所居室
亦爲宮室之官金守之國兵起彗星尤甚也

宋兩朝天文志危三星距南星去極九十六度 人
五星距西南星去極七十度入虛宿六度半 杵三
星距南星去極六十一度半入危宿三度 白四星
距西南星去極六十九度半入危宿三度半 車府
七星距西第一星去極五十六度半入虛宿四度半
造父五星距北星去極三十八度入危宿十一度
墳墓四星距中星去極九十六度入危宿五度半
虛梁四星距東西去極一百度半入危宿八度
天錢十星距東北星去極一百一十八度入危宿三
度 蓋屋二星距西星去極九十七度入虛宿九度

室兩星上有離宮出遶室三雙有六星下頭六箇雷電形壘壁陣次十二星十二兩頭大似并陣下分布羽林軍四十五卒三爲羣軍西四星多難論子細歷歷看區分三粒黃金名鈇鉞一顆真珠北落門門東八魁九箇子門西一宿天綱是電傍兩黑土公吏騰蛇室上二十

二

室十七度亦謂之營室甘氏爲太廟天子之宮也石氏謂之元宮一曰清廟又謂軍糧之府及土功事星明國昌小不明祠祀鬼神不享國多疾疫動則有土功兵出野離宮六星兩兩居之分布室壁之間天子

之別宮也主隱藏休息之所金火守入則兵起室南六星曰雷電主與雷動蟄明或動則震雷作壁陣十二星在羽林北橫列營室之南羽林之垣壘也星衆而明則安寧希而動則兵革起不見天下亂五星入天軍皆爲兵起金火水尤甚羽林四十五星三三而聚散在營室之南天軍也主軍騎又主翼王也星衆而明則安寧希而動則兵革起不見天下亂金火水守入兵起斧鉞三星亦曰斧鑕在八魁西北主誅夷不明則斧鑕不用移動則兵起有星入之皆爲大臣誅北落師門一星在羽林西南天之蕃落也亦曰天

軍蕃之候門長安北門曰北落門以象此也主非常
以候兵明大則軍安微弱則兵起金火守之有兵災
一曰有星守之虜入塞北落東南九黑星曰八魁主
張禽獸之官也客星入之多盜賊兵起金火入亦然
北落西南一星曰天綱主武帳天子游獵之所會金
火守兵起室西南二星曰土功吏主土功之官也動
搖則有修築之事隋志土功吏主司過度騰蛇二十
二星在營室北若盤蛇之狀居於河濱謂之天蛇星
主水蟲微則國安明則不寧移南大旱移北大水客
星守之水雨爲災水物不收

宋兩朝天文志室二星距南星去極八十度半
雷電六星距西南星去極八十七度入危宿十二度
壁陣壘十二星距西第一星去極一百十五度入女
宿十一度 羽林四十五星距大星去極一百一十
七度入危宿十五度半 斧鉞三星距北星去極一
百三十度入室宿二度 北落師門一星去極一百
二十六度入危宿十一度半 八魁九星距南星去
極一百三十九度入壁宿四度半 天綱一星去極
一百二十九度入危宿五度 土公二星距西星去
極八十五度入壁宿初度 騰蛇二十二星距中大

星去極四十四度少入危宿九度半

宋中興天文志曰甘氏云雷電在室南霹靂在雷電南雲雨在霹靂南土工吏在壁西南蓋雷公電姥雲將雨師與夫霹靂斧吏皆北方水府之精而媿訾爲天門故其神棲焉室不得司之也

壁兩星下頭是霹靂霹靂五星橫著行雲雨次之曰四方壁上天廐十圓黃鈇鑽五星羽林傍

壁九度下九尺爲天之中道主文章天下圖書之祕府也亦主土功明則圖書集道術行小人退君子進星失色大小不同天子重武臣賤文士圖書隱親黨

回邪用星動則有土功離徙就聚爲田宅事日月食損賢臣五星孛犯兵起土功西南五星曰霹靂主與雷奮擊明而動用事不明凶霹靂南四星曰雲雨明則多雨水火守之大旱天廐十星在東壁北蓋天馬之廐今之驛亭也不見則天下道斷鈇鑽五星在天倉西門刈具也主斬芻飼牛馬明則牛馬肥微暗則牛馬饑餓并死喪也

宋兩朝天文志壁二星距南星去極八十度半 霹靂五星距西星去極九十三度入危宿十五度 雲雨四星距西北星去極九十五度入室宿五度 天

廡十星距西星去極四十九度半入壁宿初度

西方 白虎七宿

宋中興天文志石氏云西宮白帝其精白虎爲七宿
奎象白虎婁胃昴虎三子也畢象虎背參象麟背首
參身也司秋司金司西嶽司西海司西方司毛蟲三
百有六十王奕曰蒼龍朱雀靈龜不獨蟲之長也實
爲王者嘉瑞故列宿象焉白虎奚預也曰白虎亦瑞
獸也爾雅謂之魋胡甘反蓋騶虞之異名也不食生
物食自死肉其性至仁五靈之一也以五行媿之蒼
龍木也木得其性則蒼龍見朱鳥火也火得其性則

朱鳥見靈龜水也水得其性則靈龜見白虎金也金
得其性則白虎見與麟鳳龜俱爲王者之瑞故西方
七宿配焉漢宣帝時南郡獲白虎宋元嘉中琅琊有
白虎史臣俱以爲瑞而特書之也

奎腰細頭尖似破鞋一十六星遶鞋生外屏七烏奎下
橫屏下七星天溷明司空左畔土之精奎上一宿軍南
門河中六箇閣道形附路一星道傍明五箇吐花王良
星良星近上一策名

奎十六度天之武庫也石氏謂之天豕亦曰封豕主
兵九尺下爲天之中道又主溝瀆西南大星所謂天

彘目亦曰大將明則天下安動則兵亂客星守入兵起金火守有水災隋志云若帝淫佚政不平則奎角角動則有兵不出年中或有溝瀆之事又曰奎中星明水大出日月食五星犯皆有凶奎南七星曰外屏以蔽天溷也占與天困同天溷七星在外屏南天之厠也不見則人不安移徙亦然天溷南一星曰土司空主水土之事大而黃明天下安若客星入之多土功天下大疫軍南門一星在將軍西南主誰何出入動搖則軍行不見則兵亂閣道六星在王良前飛道也從紫宮至河神所乘也一曰主道里張衡云天

子游別宮之道一曰王良旗一曰紫宮旗亦所以爲旌表而不欲其搖動一星不具則輦道不通動搖則宮掖之內兵起附路一星在閣道南傍別道也備閣道之敗復而乘之也一曰太僕主禦風雨亦游從之義也一曰占與閣道同王良五星在奎北居河中天子奉車御官也其四星曰天駟旁一星曰王良亦曰天馬其星動爲策馬故曰王良策馬車騎滿野亦曰王梁梁爲天橋主禦風雨水道故或占津梁其星移主有兵亦曰馬病客星守之橋不通金火守之皆爲兵憂前一星曰策王良之御策也主天子僕御在王

良旁若移在馬後是謂車騎滿野

宋兩朝天文志奎十六星距西南大星去極七十二度外屏距西星去極八十九度入壁宿八度半天濶七星距西南星去極九十七度入奎宿三度主司空一星去極一百一十五度少入壁宿九度軍南門一星去極六十六度入奎宿十五度附路一星去極三十五度半入奎宿五度王良五星距西星去極三十七度入壁宿初度

婁三星不勻近一頭左更右更烏夾婁天倉六箇婁下頭天庾三星倉東脚婁上十二將軍侯

婁十二度下九尺爲日月中道亦爲天獄主苑牧犧牲供給郊祀亦爲興兵聚衆動搖則聚衆星直則有執主之命者就聚國不安金火守之則宮苑之內兵起日月食宮內亂金木火土犯凶水犯吉孛起兵月暈兩軍各退左更五星在婁東山虞也主知山澤林藪之事亦主仁智右更五星在婁西牧師也主官養牧牛馬亦主禮義金火守之山澤有兵其占兩更同兩更者秦爵名天倉六星在婁南倉穀所藏也星黃而大歲熟西南四星曰天庾積厨粟之所也天將軍十二星在婁北主武兵中央大星天之天將也外小

星吏士也大將星搖兵起大將出小星不具兵起
宋兩朝天文志婁三星距中星去極七十五度半
左更五星距西南星去極七十六度半入婁宿四度
半右更五星距東北星去極七十五度入奎宿十
四度天倉六星距西北星去極一百四度半入奎
宿十一度天庾三星距中大星去極一百二十五
度半入婁宿五度天大將軍十二星距大星去極
六十度半入婁宿四度

胃三星鼎足河之次天廩胃下斜四星天困十三如乙
形河中八星名大陵陵北九箇天船名陵中積尸一箇

星積水船中一黑星

胃十五度天之厨藏五穀之倉也又名大梁明則四
時和平天下晏然倉廩實不明則上下失位星少則
少穀輸運又云動則有輸運事就聚則穀貴人流暗
則凶荒五星犯日月食孛侵並有災天廩四星在昴
南一曰天膺張衡云主積蓄黍稷以供享祀春秋所
謂御廩也天困十三星在胃南倉廩之屬主給御糧
也明而黃則歲豐微變常色則不吉金火守之卽災
起大陵八星在胃北主陵墓明而大或中星多則天
下多死喪或兵起天船九星在大陵之北居河中一

曰舟星主渡亦主水旱不在河中津河不通水泛溢
中四星欲其均明即天下安不則兵若喪移徙亦然
客彗出入爲大水有兵大陵中一星曰積尸明則死
人如山張衡云一名積廩積尸明而大或有傍星多
則天下足死喪或兵起若不見而暗皆吉火守則天
下大哭泣天船中一星曰積水主候水災

宋兩朝天文志胃三星距西南星去極六十七度半
天廩四星距南星去極八十五度半入胃宿十二
度 天困十三星距大星去極九十一度半入胃宿
六度半 大陵八星距大星去極五十四度入胃宿

七度 天船九星距大星去極五十四度半入胃宿

十度 積尸一星去極五十五度入胃宿四度 積

水一星去極五十三度入昴宿初度 食也 一日天

昴七星一聚實不少河西月東各一星月下五黃天陰

名陰下六鳥芻藁營營南十六天苑形河裏六星名卷

舌舌中黑點天讒星礪石舌傍斜四丁 四所劍斯也 不

昴十一度下爲日月中道天之耳目也主西方主獄

事又爲旄頭胡星也又主喪甘氏云主口舌奏對若

明大則君無佞臣天下安和暗小則佞者被誅搖動

則信讒殺忠良張衡云昴明則獄訟平暗則刑罰濫

六星與大星等大水有白衣會七星黃兵大起動搖
有大臣下獄大而盡動若跳躍者胡兵大起若星不
見皆憂兵之象也天河一星在胃東月一星在昴東
皆黑星並主女人災福又曰天河主察山林妖變天
陰五星在畢柄西主從天子弋獵之臣預陰謀也不
明則禁言漏洩天苑十六星在昴畢南如環狀天子
之苑囿養禽獸之所也主馬牛羊明則馬牛羊盈希
則死芻藁六星在苑西以供牛馬之食也一曰天積
天子之藏府也星盛則歲豐穰希則貨財散張衡云
不見則牛暴死火守之則火災起卷舌六星在昴北

天讒之外主口語以知讒佞張衡云主樞機曲而靜
則賢人用直而動則讒人得志卷舌移出漢則天下
多妄言旁星繁則死人如邱山天讒一星在卷舌中
主醫巫占與從官同礪石四星在五車北主磨礪鋒
刃明則兵起如常則吉金火及客星守之兵動

宋兩朝天文志昴七星距西南星去極七十度天
河一星去極六十六度入胃宿十度月一星去極
七十一度半入昴宿五度天陰五星距西星去極
七十五度半入胃宿七度天苑十六星距東北星
去極一百七度半入昴宿七度半芻藁六星距西

行中星去極一百八度入婁宿十一度 卷舌六星
去極五十三度入昴宿初度 天譏一星去極六十
一度半入昴宿半度 礪石四星距南第二星去極
六十五度入昴宿六度

宋中興天文志月與天街皆在昴畢間故昴畢之間
爲天街黃道之所經也月者陰宗之精也爲兔四足
爲蟾蜍三足兔在月中而蟾蜍之精爲星以司太陰
之行度月生於酉故於是在焉日精在氐房月精在
昴畢自司其行度而氐房昴畢乃黃道之所經不得
而司之

畢恰似爪叉八星出附耳畢股一星光天街兩星畢背
傍天節耳下八烏幢畢上橫列六諸王王下四皂天高
星節下團圓九州城畢口斜對五車口車有三柱任縱
橫車中五箇天潢精潢畔咸池三黑星天關一星車脚
邊參旗九箇參車間旗下直建九旂連旂下十三烏天
園九旂天園參脚邊

畢十七度主邊兵主弋獵其大星曰天高一曰邊將
主四夷之尉也星明大則遠夷來貢天下安失色則
邊兵亂一星亡爲兵喪動搖邊城兵起有讒臣離徙
天下獄亂就聚法令酷甘氐云畢主街巷陰雨天之

兩師也故明而移動則霖潦及街壅塞明而定則天下安張衡云畢爲天馬一曰日月食邊兵凶將衰木犯有軍功昴畢間二星曰天街三光之道也主伺候關梁張衡云主國界也街南爲華夏街北爲夷狄金火守之胡夷兵起明王道正暗兵起附耳一星在畢下天高東南隅主聽得失伺愆邪察不祥星盛則中國微有盜賊邊候警外國反鬪兵連年合移動則佞讒行兵大起邊尤甚入畢兵起天節八星在畢南主使臣之所持也宣威德於四方明吉暗凶諸王六星在五車南天漢之中主宗社蕃屏王室也明則諸侯

奉上下安不見宗社傾危四方兵起天高四星在參旗西北近畢此臺榭之高主遠望氣象不見則官失其守陰陽不和五車五星三柱九星共十四星在畢東北五車主天子五兵張衡云天子兵車舍也西北曰天庫主太白秦也次東北星曰天獄主辰星燕趙也次東南星曰天倉主歲星衛魯也中央星曰司空主鎮星楚也次西南星曰卿星主熒惑魏也五星有變各以其所主而占之三柱一曰三泉一曰休一曰旗五星均明柱皆具卽人倉廩實不具其國絕食兵且起五車三柱有變各以其國占之三柱出外兵

出柱入兵入柱出一月米貴三倍期一年出兩月米
貴六倍期二年出三月米貴十倍期三年柱出不與
天倉相近米穀運出千里柱倒立尤甚火入守天下
旱金入守兵起水入月暈不爾則有赦天潢五星在
五車中主河梁濟渡之處也不見則河梁不通咸池
三星在五車中天潢南魚囿也金火犯之則有大災
隋志云月五星入天潢兵起道不通天下亂易政咸
池明有龍墜死虎狼害人兵起天關一星在五車南
畢西北亦曰天門日月五星所行之道也主邊塞事
主關閉芒角有兵五星守之貴人多死移徙若與五

車合大將軍披甲參旗九星在參西五車之間天旗
也明而希則邊寇不動不然反是隋志參旗一曰天
旗一曰天弓主司弓弩之張候變禦難玉井西南九
星曰九旂天子之旗也主邊軍進退金火守之兵亂
起天苑之南十三星曰天園植果菜之所也曲而鈎
則果菜熟不然則否

宋兩朝天文志畢八星距右股第一星去極七十五
度天街二星距南星去極七十一度入昴宿十度
附耳一星去極七十七度畢宿三度天節八星
距北星去極八十度半入畢宿三度諸王六星距

西星去極七十度入畢宿三度 天高四星距東星
去極七十四度半入畢宿六度 五車五星三柱九
星距大星去極四十七度半入畢宿八度半 天潢
三星距西北星去極五十八度入畢宿十一度 咸
池三星距南星去極五十一度入畢宿十一度半
天關一星去極七十一度半入觜宿初度 參旗九
星距南第一大星去極八十七度入畢宿六度 九
游九星距南星去極一百一十三度入畢宿十二度
天園十三星距東北星去極一百二十四度入畢
宿五度

觜三星相近作參彙觜上坐旗直指天尊卑之位九相
連司怪曲立坐旗邊四鴟大近井鉞前

觜一度在參之右角如鼎足形主天之關明大則天
下安五穀熟移動則君臣失位天下旱隋志云觜觶
爲三軍之候行軍之藏府主葆旅收斂萬物明則軍
儲盈將得勢動而明盜賊羣行葆旅起動移將有逐
者張衡云葆旅野生之可食者金火來守國易政兵
起災生日食臣不忠月食君害臣五星犯災生孛客
星犯兵起坐旗九星在司怪西北主別君臣尊卑之
位明則國有禮暗則反是司怪四星在井鉞前候天

地日月星辰禽獸蟲蛇草木之變與天高占同
宋兩朝天文志觜三星距西南星去極八十二度半
坐旗九星距南星去極六十一度半入參宿八度
司怪四星距西星去極七十一度入參宿六度半
參總有三星觜相侵兩肩雙足三爲心伐有三星足裏
深玉井四星右足陰屏星兩扇井南襟軍井四星屏上
吟左足下四天厠臨厠下一物天屎沉

參十度上爲五星日月中道甘氏曰參爲忠良孝謹
之子明大則臣忠子孝安吉移動殺忠臣一日參伐
一日大辰一日天市一日鈇鉞主斬刈又爲天獄主

殺伐又主權衡所以平理也又主邊城爲九譯故不
欲其動也參白獸之體其中三星橫列三將也東北
曰左肩主左將西北曰右肩主右將東南曰左足主
後將軍西南曰右足主偏將軍故黃帝占參應七將
中央三小星曰伐天之都尉也主胡鮮卑戎狄之國
故不欲明又曰七將皆明天下兵精也王道缺則芒
角張伐星明與參等大臣謀亂兵起參星失色軍散
敗芒角動搖邊候有急天下兵起又曰有斬伐之事
參左足入玉井中兵大起秦地大水若有喪山石爲
怪參足若突出玉井則虎狼暴害星差戾王臣貳金

火來守則國易政兵起災生日月食則田荒米貴五星犯災甚玉井四星在參西右下水象也屏二星在玉井南屏爲屏風客星入之四足蟲大疾人亦多死不見則國內寢疾玉井東西四星曰軍井行軍之井也軍井未達將不言渴名取此也又曰主軍營之事天厠四星在屏東溷也主天下疾病黃吉青赤白皆凶不見與屏同天屎一星在厠南色黃則吉他色皆凶

兩朝天文志參十星距中星西第一星去極九十二度半 玉井四星距西北星去極九十八度少入畢

宿十一度半 天屏二星距南星去極一百一十五度入畢宿十三度半 軍井四星距西南星去極一百五度半入畢宿十四度 天厠四星距西北星去極一百一十度半入參宿二度 屎一星去極一百一十五度入參宿三度半

南方 朱鳥七宿

中興天文志石氏云南宮赤帝其精朱鳥爲七宿井首鬼目柳喙星頸張喙翼翮軫尾司夏司火司南嶽司南海司南方司羽蟲三百有六十王奕曰朱鳥其以羽蟲之長稱歟而曰鶉首鶉火鶉尾何也師曠禽

經鶉鳳也青鳳謂之鶉赤鳳謂之鶉白鳳謂之鶉紫
鳳謂之鶉蓋鳳生於丹穴鶉又鳳之赤者故南方七
宿取象焉考之月令春其蟲鱗龍鱗之長故東方之
宿爲蒼龍秋其蟲毛虎毛蟲之長故西方之宿爲白
虎冬其蟲介龜介蟲之長故北方之宿爲元武夏其
蟲羽鳳羽蟲之長故南方之宿爲朱鳥吳興沈氏以
朱鳥爲丹鶉豈知四獸皆蟲之長也鶉之微何預

井八星行列河中淨一星名鉞井邊安兩河各三南北
正天樽三星井上頭樽上橫列五諸侯侯上北河西積
水欲覓積薪東畔是鉞下四星名水府水位東邊四星

序四瀆橫列南河裏南河下頭是軍市軍市團圓十三
星中有一箇野雞精孫子丈人市下列各立兩星從一
說闕邱三箇南河東邱下一狼光蓬茸左畔九箇彎弧
弓一矢擬射頑狼曾有箇老人南極中春秋出來壽無
窮

井三十四度甘氏云井八星在河中主泉水日月五
星貫之爲中道石氏謂之東井亦曰天井主諸侯帝
戚三公之位故明大則封侯建國搖動失色則誅侯
戚廢戮三公帝師受殃矣張衡云天之南門也黃道
所經爲天子之亭候主水衡事法令所取平也王者

用法平則井明而端列鉞一星附井之前主伺奢淫而斬之故不欲其明大與井齊或搖動則天子用鉞於大臣月宿井有風雨之應又曰井爲天子府暗芒并日月食五星逆犯大臣謀亂兵起中有六星不欲大明明卽水災南北兩河各三星分夾東井一曰天高天之闕門主關梁河南曰南戍一曰南宮一曰陽門一曰越門一曰權星主火北河曰北戍一曰北宮一曰陰門一曰胡門一曰衡星主水兩戍之間三光星之常道也河戍動搖中國兵起天樽三星在五諸侯南主盛饘粥以給酒食之正也張衡云以給貧餒明

則豐暗則荒或言暗吉五諸侯五星在東井東北近北河主刺舉戒不虞又曰治陰陽察得失亦曰主帝心一曰帝師二曰帝友三曰三公四曰博士五曰太史又曰五曰大夫此五者常爲帝定疑議星明大潤澤則天下大治芒角則禍在中張衡又曰五諸侯治陰陽察得失明而潤大小齊等則國之福又曰赤則豐暗則荒積水一星在河北所以供酒用也不見爲災又曰主候水災積薪一星在積水東以備庖厨之用明則人主康火守之大旱水府四星在東井西南水官也占與水位同水位四星在東井主水衡又主

瀉溢流也故巫咸氏贊曰水位四星瀉溢流移動近
北河則國沒爲江河若水火及客星守犯之百川盈
溢四瀆四星在井南軒轅東是江河淮濟之積精也
明大則水泛溢軍市十三星如錢狀在參東南天軍
貨易之市客星及金火守之軍大饑野鷄一星在軍
市中主變怪也以芒角動搖爲兵災移出則諸侯兵
起軍市西南二星曰丈人文人東二星曰子子東二
星曰孫丈人主壽考之臣不見人臣不得通子與孫
皆侍丈人之側相扶而居不見爲災守常無咎闕邱
三星在南河東主象魏天子之雙闕諸侯之兩觀也

金火守之兵戰闕下狼一星在井東南爲野將主殺
掠色有常不欲變動角而變色動搖盜賊作胡兵起
人相食躁則人主不靜不居其宮馳騁天下張衡云
居非其處則人相食色黃白而明吉黑凶赤芒角兵
起金火守之亦然弧矢九星在狼東南天弓也以備
盜賊嘗向狼弧矢動搖不如常者多盜賊明則兵大
起狼弧張害及胡天下垂亂又曰天弓張天下盡兵
主與臣相謀張衡云滿則天下兵起老人一星在弧
南一曰南極常以秋分之旦見於丙春分之夕沒於
丁常以秋分候之南郊明大則人主有壽天下安寧

不見則人主憂

兩朝天文志井八星距西扇北第一星去極六十九度鉞一星去極六十九度少入參宿八度半北

河三星距東大星去極六十一度半入井宿二十度

南河三星距東大星去極八十三度半入井宿二

十一度天樽三星距西星去極六十八度入井宿

十六度五諸侯五星距西星去極五十六度半入

井宿六度半積水一星去極五十四度半入井宿

十八度積薪一星去極六十五度半入井宿二十

七度水府四星距西星去極七十六度半入參宿

七度半水位四星距西星去極七十三度半入井

宿十八度四瀆四星距西南星去極八十六度入

井宿二度軍市十三星距西北星去極一百七度

半入井宿初度野鷄一星去極一百九度半入井

宿四度半丈人二星距西星去極一百二十八度

入參宿四度子二星距西星去極一百二十八度

入參宿九度孫二星距西星去極一百二十五度

入井宿六度闕邱二星距大星去極九十一度少

入井宿十五度狼一星去極一百七度半入井宿

十度弧矢九星去極一百一十四度入井宿十五

度 老人一星去極一百四十三度入井宿三度
宋中興天文志南極老人在弧矢南司天下人民壽
算蓋北極在丑艮故南極在未坤南極入地三十六
度不可得而見也故其精神出地以見乎南謂之南
極老人然其出地亦不甚遠故隱見不常見則爲祥
其勢位等威蓋與中斗相埒以輔上帝故雖在井分
井不得而司之也

鬼四星冊方似木櫃中央白者積尸氣鬼上四星是燿
位天狗七星鬼下是外厨六間柳星次天社六箇弧東
倚社東一星是天紀

輿鬼二度爲日月五星之中道主死亡疾病張衡云
主祠事天日也又主視明察奸謀東北星主積馬東
南星主積兵西南星主積布帛西北星主積金玉隨
其變占之中央一星名積尸亦曰積尸氣者但見氣
而已主死喪祠祀一曰鈇質主誅斬鬼星明六穀成
不明人散動而光上賦斂重徭役多星徙人愁政令
急鬼質欲其忽忽不明則安明則兵起大臣謀主下
流亡甘氏云積尸搖動失色則疾病鬼哭人荒軒轅
西四星曰燿亦曰烽燿主烽火備警急占以不明安
靜明大甚則邊亭警急搖動芒角亦然又曰明吉暗

凶天狗七星在鬼西南狼之北橫河中以守賊也移
徙則兵起金火守之人相食外厨六星在柳南天子
之外厨也占與天厨同弧南六星爲天社在老人東
南似柳直明則吉隋志云共工之子勾龍能平水土
故祀以配社其精爲星外厨之南一星曰天紀主知
禽獸齒歲金火守之禽獸多死

兩朝天文志鬼四星距西南星去極六十九度半

權四星距西北星去極六十度半入井宿二十九度

天狗七星距西星去極一百二度入井宿二十二

度外厨六星距大星去極九十二度半入鬼宿二

度天社六星距西南星去極一百三十四度入井

宿十二度天紀一星去極一百一度半入柳宿五

度

柳八星曲頭垂似柳近上三星號爲酒享宴大醕五星

守

柳十四度上爲天之中道甘氏云主飲食倉庫酒醋
之位明大則人豐酒食搖動則大人酒死失色則天
下不安饑饉流於道路不過三年必應張衡云柳爲
朱雀之喙天之厨宰也主尚食和滋味隋志云又主
雷雨一曰天相一曰天庫一曰注又主木功星明大

臣重慎國安厨食具注舉首王命與輔佐出星直天
下謀伐其主就聚兵鬪國門酒旗三星在軒轅右角
之南酒官之旗也主宴享飲食五星守酒旗天下大
酺有酒肉財物之賜及爵宗室

兩朝天文志柳八星距西第三星去極八十二度半
酒旗三星距西北星去極七十七度入柳宿十四
度

星七星如鈎柳下生星上十七軒轅形軒轅東頭四內
平平下三箇名天相相下稷星橫五靈

七星七度甘氏云主后妃御女之位亦爲賢士失色

芒動則后妃死賢士誅明大則道化成國盛張衡云
七星爲朱鳥之頸一名天都主衣裳文繡隋志云主
急兵守盜賊故欲明明則主道昌暗則賢良不處天
下空天子疾動則兵起離則易政日食兵饑婦人災
木犯人安火犯旱金土水犯俱災月暈孛犯兵起軒
轅十七星在七星北黃帝之神黃龍之體也后妃之
主士女職也一日東陵一日權星主雷雨之神南大
星女主也次北一星夫人也屏也上將也次北一星
妃也次將也其次諸星皆次妃之屬也女主南小星
女御也左一星少民少后宗也右一星大民太后宗

也欲其色黃小而明也張衡云軒轅如龍之體主雷雨之神後宮之象焉陰陽交合盛爲雷激爲電和爲雨怒爲風亂爲霧凝爲霜散爲露聚爲雲立爲虹蜺離爲背喬分爲抱珥此乃十四變皆軒轅主之其星欲小而黃明則吉移徙則國人流逆東西角張而振后敗水火金守之女主惡也漢注曰軒轅爲權太微爲衡月五星守犯者如衡占內平四星在中台南燿之北平罪之官也明則刑罰平暗則否酒旗南三星曰天相丞相之象也其占與相星畧同稷五星在七星之南主農正也取乎百穀之長以爲其號明大則

歲大豐不明則儉不見則人相食

兩朝天文志星七星距大星去極九十六度 軒轅

十七星距大星去極七十五度入張宿二度 內平

四星距西星去極五十二度入張宿六度 天相三

星距北星去極九十五度入星宿六度 天稷五星

距大星去極一百三十七度入柳宿十三度

中興天文志石氏云中宮黃帝其精黃龍爲軒轅首枕星張尾掛柳井體映三台司四季司中嶽司中土司黃河江漢淮濟之水司黃帝之子孫司保蟲三百六十按張衡靈憲蒼龍連蜷於左白虎猛據於右朱

雀奮翼於前靈龜圈脊於後黃龍軒轅於中則是軒轅一星與蒼龍白虎朱雀元武四獸爲五矣世之言星者惟知四獸而不知黃龍是求之未盡也孟康曰軒轅爲權太微爲衡以軒轅一曰權星故爲權太微垣主理法平詞如衡之平故曰衡史記正義謂權四星在軒轅尾西非也軒轅西四曰燿星主烽火備警急不曰權也燿字從火誤爲權字張守節不審指以釋此殊爲踈繆

又曰或謂自有乾象便有此星軒轅果黃帝之神也有黃帝而後有之乎呂氏曰軒轅之星黃龍也兩角有軒轅之象故名之曰軒轅軒轅降神而生黃帝知之故自號曰軒轅云爾號軒轅非名也且如王良奚仲造父皆星名亦其神降而爲人人去而復爲星也何獨於軒轅疑之

按軒轅本天市垣之星而在張宿之分野則南方朱鳥七宿之所司也三垣中外官諸星雖所掌有小大其位有尊卑而未有不隸於二十八宿者蓋二十八宿分布周天之躔度分野不可外也中興天文志據石氏星書以黃龍軒轅配四方二十八宿所謂青龍朱鳥元武白虎者分而爲五而以爲

土德寄主鶉火夫五行之不可缺土土之寄王固
然矣遂以爲燿積水積薪五諸侯天樽闕邱北河
南河四瀆水位諸星皆爲軒轅之屬按燿以下諸
星與軒轅亦俱寄躔於二十八宿者也今欲尊軒
轅而以諸星屬之則軒轅豈能外二十八宿而自
爲躔度分野以處諸星乎
張六星似軫在星傍張下只是有天廟十四之星冊四
方長垣少微雖向上星數歛在太微傍天尊一星直上
黃

張十七度甘氏云主天廟明堂御史之位上爲天之

中道若明大國則盛強失色宗廟不安明堂宮廢隋
志云主珍寶宗廟所用及衣服又主天厨飲食賞賚
之事星明則王者行五禮得天之中動則賞賚離徙
天下有逆人就聚有兵金火守之有兵起或云主貢
物色細無光王者少子孫日食虧修禮也月食大滂
魚行人道火孛犯兵起土水犯國不寧張南十四星
曰天廟天子祖廟也客星守之祠官有憂其占與虛
梁同長垣四星在少微南主界域及胡夷火守之胡
人入中國太白入之九卿謀反少微四星在太微西
南北列士大夫之位也一名處士亦天子副主或曰

博士官一曰主衛掖門南第一星爲處士第二星爲
議士第三星爲隱士第四星爲大夫明大而黃則賢
士舉月五星犯守之處士女主憂宰相易

兩朝天文志張六星距西第二星去極一百二度半
天廟十四星距西北星去極一百十三度半入柳
宿十三度 長垣四星距南星去極七十六度入張
宿十四度 少微四星距東南大星去極六十五度
半入張宿十五度半

翼二十二星太難識上五下五橫著行中心六箇恰似
張更有六星在何處三三相連張畔附必若不能分處

所更請向前看記取五箇黑星翼下頭欲知名字是東
甌

翼十九度甘氏云主太微三公化道文籍失色則民
流日月交食五星並逆芒動則化道不行文籍壞滅
動移則三公廢明大則化成隋志云翼爲天之樂府
主俳倡戲樂又主夷狄遠客負海之賓明大則禮樂
興四夷來賓動則蠻夷使來離徙則天子舉兵或云
明則禮樂興暗則政教失日食臣僭月食婦人憂五
星孛流客犯大凶東甌五星在翼之南蠻夷星也張
衡云主東越穿胃越三夷金火守之其地有兵芒角

動移兵內叛

兩朝天文志翼二十二星距中央西第二星去極百四度東甌五星距西南星去極一百二十九度入張宿七度

軫四星似張翼相近中央一箇長沙子左轄右轄附兩星軍門兩黃近翼是門下四箇土司空門東七烏青邱子青邱之下名器府器府之星三十二以上便爲太微宮黃道向二看取是

軫十七度甘氏云軫七星主將軍樂府歌謔之事五星犯之失位亡國女子主政人失業賊黨掠人禍生

於百日內若明大則天下昌萬民康四海歸王張衡云軫爲冢宰輔臣也主車騎明大則車騎用一云明大則車騎用一二云明大則車騎動隋志云主載任有軍出入皆占於軫又主死喪明則車駕備動則車騎用離徙天子憂就聚兵大起軫轄星附軫兩傍主王侯右轄爲王者同姓左轄爲異姓星明兵大起遠軫凶軫轄舉南蠻侵張衡云轄不見國有大憂長沙一星在軫之中主壽命也長沙明則人壽長子孫盛軍門二黃星在青邱西天子六軍之門也主營候豹尾威旗占以移其處爲道不通土司空四黃星在軍門

南主土功巫咸氏云金火犯之天下田不得耕女不得織隋志云一曰司徒主界域青邱七黑星在軫東南主東方三韓之國占與東甌同軫南三十二星曰器府主樂器之屬也明則樂器調理暗則有咎

兩朝天文志軫四星距西北星去極一百三度半

右轄星去極一百一十度半入翼宿十六度半 左

轄星去極一百一度半入軫宿五度 軍門二星距

西南星去極一百一十二度半入翼宿十三度 土

司空四星距南星去極一百二十度入翼宿十四度

青邱七星距西北星去極一百二十四度半入軫

宿五度 器府三十二星距西北星去極一百三十七度半入翼宿八度半

中興天文志總論曰甘石巫咸三家後代所宗也顧或不深考以故三垣大角之列衛二十八舍內官外官之分隸不無異同今於三家參諸說考定二百九十座所以不知者闕如也蓋諸星有以一星爲一座者有以二三十星爲一座者有相爲比附者有相比而不附者杠附華蓋凡十八星爲一座衡附庫樓凡二十九星爲一座也鉞不附井耳不附畢糠不附箕長沙不附軫鈞鈐鍵閉不附房則以屬吏自爲官故

也矢得以附弧曰不得以附杵以弧矢一人司之杵
曰二人司之故也野鷄不附軍市鷄自守其所司也
南門不附庫樓南門不但爲庫樓門也他如積水不
附天船積尸不附大陵天讒不附卷舌咸池天潢三
淵不附五車石氏甘氏皆有其辨不可臆說也若夫
稱名取類傳記錯見則又有不可概舉者北極爲北
辰水星爲辰參爲大辰而大火亦曰大辰宋大辰之
墟是也見左氏昭十七年孫炎曰龍星明者以爲時
刻故曰大辰心在中最明時刻主焉元枵亦曰天竈
星在天竈是也見國語武王伐商星在天竈昭十九

年疏天竈元枵別名也媿訾亦曰豕韋歲在豕韋是
也見襄十八年疏豕韋亦名媿訾也鶉尾亦曰鳥帑
以害鳥帑是也見襄二十八年裨竈曰歲棄其次而
旅於明年之次以害鳥帑注南爲朱鳥鳥尾曰帑疏
曰人妻子爲帑鳥尾曰帑妻子爲人後鳥尾亦鳥之
後故俱以帑爲言也氏謂之天根見爾雅天根氏也
郭璞曰角亢下繫於氏猶木之有根國語曰天根見
而水涸也室謂之定見爾雅云營室謂之定郭璞曰
定正也作宮室以營室中爲正詩定之方中作于楚
宮昂謂之留見史記索隱曰留昂也而毛傳亦以留

爲昴也畢謂之濁見爾雅濁謂之畢也柳謂之昧丁
救反見襄九年昧爲鶉火疏曰柳謂之昧昧鳥口也
若斯名類昉於堯典詳於爾雅左氏國語諸書而所
入之度則未悉也若夫二十八舍諸言度分亦或差
殊斗井度視諸舍爲闊參僅一度古昏旦至觀弧建
爲定亦由所見而莫著其度近世王奕所述十二次
二十八度有可考焉

按史志言三家所考三垣大角之列衛二十八舍
內外官之分隸不無異同今按歷代天文志惟宋
兩朝及中興志與隋丹元子步天歌能言諸星之

分隸然大角一星兩朝志以爲屬亢中興志以爲
屬角庫樓十星丹元子以爲屬角而兩朝志以爲
屬軫其爲異同大概若此蓋自唐開元中一行所
造渾儀其所測宿度已與舊經異而宋太平興國
中渾儀所測又與唐異所爭或一二度或三五度
以管窺天豈能無誤於是此以爲軫彼以爲角甲
以爲氐乙以爲房所差者常在裨鄰之次舍則亦
不過三五度間耳天道幽遠術家各持一說固未
有以訂其是非也至如南斗六星卽斗牛之斗則
其分野反在北方北斗天樞在張宿十度則其分

野反在南方則其理有不可究詰者當俟知星者而質之

二十八宿度

中興天文志王奕按自古言天者皆曰周天三百六十五度四分度之一何從而知審也曰天本無度因日之行一晝夜所躔闊狹強名曰度蓋日之行也三百六十五日之外又行四分日之一以一年而周於天焉以一日所行爲一度故分爲二百六十五度四分度之一范蔚宗謂日之所行在天成度在歷成日是也曰天固有其度而二十八宿亦各有度何從而

定之一也曰二十八宿亦未始有度也天體冲漠雖分爲三百六十五度然其度難別也故作歷者隸其度於二十八宿用以紀日月所躔而已蓋天之有度也猶地之有里也二十八宿所分之度猶九州列縣所占之里也二十八宿各有其度則日之行於天也孟春在某星幾度仲春在某星幾度日躔可得而名也九州列縣各有其里則人之行於地也某日至某州幾里某日至某縣幾里驛可得而計也此星度所由起也曰二十八宿之度或闊狹何也曰日之所躔偶與此宿相當此闊狹於是分也故說渾天者曰日

之所躔或多或寡適當其星者凡二十八故度之多寡於是生焉井斗之舍非無星也然不與日躔相當故其度不得不闊觜鬼之傍非無星也然日躔一二日而其星適於相當故其度不得不狹也夫其得度闊狹非舉一宿全體盡占此度也南斗六星也舉全體言之合距杓星爲度而今歷家距魁第四星爲度杓二星則入於箕牽牛六星也舉全體言之合距西二星爲度今歷家距中二星爲度而西二星則入於斗虛二星也舉全體言之合距北星爲度而今歷家距南星爲度北星則入於牽牛蓋南斗六星之中杓

二星不當日之度而魁第四星當度故距於魁而得二十六度牽牛六星之中西星不當日之度而中二星當度故牽牛距魁而得六度虛二星之中北一星不當日之度而南一星當度故虛距南星而得十度古之造歷假設是法以步日躔或者不察謂二十八宿本有其度又見某宿得幾度遂謂舉一宿全體在焉則又非矣又按唐志一行所謂虛北星舊圖入虛今側在須女九度危北星舊圖入危今側在虛六度半又奎誤距以西大星故壁損二度奎增二度今復距西南大星卽奎壁各得本度又柳誤距以第四星

今復用第三星張中央四星爲朱鳥嗉外二星爲翼
北距以翼而不距以膺故張增二度半七星減二度
半今復以膺爲距則七星張合得半度吳興沈氏曰
二十八宿爲二十八星當度故立以爲宿前世測候
每或改變如唐書測得畢有十七度半觜只有半度
之類皆繆說也星旣不當度自不當爲宿次自是渾
儀度距踈密不等耳凡二十八宿度數皆以赤道爲
法推黃道有不合度者蓋黃道有斜有直故度數與
赤道不等卽復以當度星爲宿惟虛度未有奇數自
是日之餘分歷家取於斗分者此也餘宿則不然

沈氏筆談曰予編校昭文書時預詳定渾天儀官
長問予二十八宿多者三十三度少者止一度如
此不均何也予對曰天事本無度推歷者無以寓
其數乃以日所行分天爲三百六十五度有奇平日
行三百六十五日有餘而一度也 旣分之必有物記之
朞天故以一日爲一度也

然後可窺而數於是以度度之星記之循黃道日
之所行一朞當者止二十八宿星而已

度如傘橈
當度謂正

當傘橈上者故車蓋二十八弓以象二十八宿則
如渾儀秦儀所謂度不可見可見者星也日月五
星之所申有星焉當度之晝者凡二十
有八謂之舍舍所以挈度所以生數也今所謂距
度星者是也非不欲均也黃道所由當度之星止

有此而已

按中興志所載王奕之說卽沈括之說也王沈二公不知其孰先孰後孰倡孰襲然王說詳而明沈說簡而當故不嫌並著之云

文獻通考卷第二百七十九

文獻通考卷第二百八十

鄱陽馬端臨貴與著

象緯考三

十二次度數

晉天文志十二次班固取三統歷十二次配十二野其言最詳又有費直說周易蔡邕月令章句所言頗有先後魏太史令陳卓更言郡國所入宿度今附而次之中興天文志王奕按星本無次古昔黃帝因日月所會而爲之名耳帝王世紀一度二千九百三十二里分爲十二次一次三十度三十分度之十四周天積一百七

萬九百一十三里經三十五萬六千九百七十一里三
統歷詳矣然帝王世紀費直周易蔡邕月令又與三統
殊少或差一二度多或五六度何也是日行也每歲有
差則日月所會之次分度亦異此言十二次所以不同
也

自軫十二度至氏四度爲壽星於辰在辰鄭之分野屬

兖州費直周易分野壽星起軫七度
蔡邕月令章句壽星起軫六度

自氏五度至尾九度爲大火於辰在卯宋之分野屬豫

州費直起氏十一度
蔡邕起亢八度

自尾十度至南斗十一度爲析木於辰在寅燕之分野

屬幽州費直起尾九度
蔡邕起尾四度

自南斗十二度至須女七度爲星紀於辰在丑吳越之

分野屬揚州費直起斗十度
蔡邕起斗六度

自須女八度至危十五度爲元枵於辰在子齊之分野

屬青州費直起女六度
蔡邕起女二度

自危十六度至奎四度爲娵訾於辰在亥衛之分野屬

并州費直起危十四度
蔡邕起危十度

自奎五度至胃六度爲降婁於辰在戌魯之分野屬徐

州費直起奎二度
蔡邕起奎八度

自胃七度至畢十一度爲大梁於辰在酉趙之分野屬

冀州 費直起婁十度 蔡邕起婁一度

自畢十二度至東井十五度為實沈於辰在申魏之分

野屬益州 費直起畢九度 蔡邕起畢六度

自東井十六度至柳八度為鶉首於辰在未秦之分野

屬雍州 費直起井十二度 蔡邕起井十度

自柳九度至張十六度為鶉火於辰在午周之分野屬

三河 費直起柳五度 蔡邕起柳三度

自張十七度至軫十一度為鶉尾於辰在巳楚之分野

屬荊州 費直起張十三度 蔡邕起張十二度

州郡躔次 陳卓范蠡鬼谷先生張良諸葛亮譙周京

房張衡並云

角亢氐鄭堯州

東郡入角一度 東平任城山陽入角六度 泰山

入角十二度 濟北陳留入亢五度 濟陰入氐一

度 東平入氐七度

房心宋豫州

潁川入房一度 汝南入房二度 沛郡入房四度

梁國入房五度 淮陽入心一度 魯國入心三

度 楚國入心四度

尾箕燕幽州

營州入箕中十度 上谷入尾一度 漁陽入尾三度 右北平入尾七度 西河上郡北地遼西東入尾十度 涿郡入尾十六度 渤海入箕一度 樂浪入箕三度 元菟入箕六度 廣陽入箕九度 斗牽牛須女吳越揚州

九江入斗一度 廬江入斗六度 豫章入斗十度 丹陽入斗十六度 會稽入牛一度 臨淮入牛四度 廣陵入牛八度 泗水入女一度 六安入女六度

虛危齊青州

齊國入虛六度 北海入虛九度 濟南入危一度 樂安入危四度 東萊入危九度 平原入危十一度 菑川入危十四度

營室東壁衛并州

安定入營室一度 天水入營室八度 隴西入營室四度 酒泉入營室十一度 張掖入營室十二度 武都入東壁一度 金城入東壁四度 武威入東壁六度 燉煌入東壁八度

奎婁胃魯徐州

東海入奎一度 琅琊入奎六度 高密入婁一度

城陽入婁九度 膠東入胃一度

昴畢趙冀州

魏郡入昴一度 鉅鹿入昴三度 常山入昴五度

廣平入昴七度 中山入昴一度 清河入昴九

度 信都入畢三度 趙郡入畢八度 安平入畢

四度 河間入畢十度 真定入畢十三度

冀參魏益州

廣漢入冀一度 越嶲入冀三度 蜀郡入冀一度

犍爲入參三度 牂牁入參五度 巴郡入參八

度 漢中入參九度 益州入參七度

東井輿鬼秦雍州

雲中入東井一度 定襄入東井八度 鴈門入東

井十六度 代郡入東井二十八度 太原入東井

二十九度 上黨入輿鬼二度

柳七星張周三輔

弘農入柳一度 河南入七星三度 河東入張一

度 河內入張九度

翼軫楚荊州

南陽入翼六度 南郡入翼十度 江夏入翼十二

度 零陵入軫十一度 桂陽入軫六度 武陵入

軫十度 長沙入軫八度度

容齋洪氏隨筆曰十二國分野上屬二十八宿其爲義多不然前輩固有論之者矣其甚不可曉者莫如晉天文志謂自危至奎爲娵訾於辰在亥衛之分野也屬并州且衛本受封於河內商墟後徙楚邱河內乃冀州所部漢屬司隸其他邑皆在東郡屬兗州於并州了不相干而并州之下所列郡名乃安定天水隴西酒泉張掖諸郡自係涼州耳又謂自畢至東井爲實沈於辰在申魏之分野也屬益州且魏分晉地得河內河東數十縣於益州

亦不相干而雍州爲秦其下乃列雲中定襄鴈門代太原上黨諸郡蓋又自屬并州及幽州耳謬亂如此而出於李淳風之手豈非蔽於天而不知地乎

天漢起沒

天河亦一名天漢起自東方箕尾間遂乃分爲南北道南經傳說入魚淵開籥戴弁鳴河鼓北經龜宿貫箕邊次絡斗魁冒左旗又合南道天津湄二道相合西南行分夾匏瓜絡人星杵畔造父騰蛇精王良附路閣道平登此太陵泛天船直到卷舌又南征五車駕向北河南

東井水位入吾驂水位過了東南游經次南河向闕邱
天狗天紀與天稷七星南畔天河沒

天漢起東方經箕尾之間謂之天河亦謂之漢津乃
分爲二道其南經傳說魚天籥天弁河鼓其北經龜
貫箕下次絡南斗魁左旗至天津下而合南道乃西
南行又分夾匏瓜絡人星杵造父騰蛇王良附路閣
道北端太陵天船卷舌而南行絡五車經北河之南
入東井水位而東南行絡南河闕邱天狗天紀天稷
在七星南而沒張衡云津漢者金之氣也其本曰水
漢中星多則水星少則旱 中興天文志石氏云天

漢蓋天一所生凝毓而成者天所以爲東南西北襟
帶之限也天下河漢之源蓋出於此故河漢者亦地
所以爲東南西北之限也漢張氏云八極之維徑二
億三萬二千三百里南北則短減千里東西則廣增
千里自地至天半於八極則地之深亦如之唐袁氏
云以是觀之天漢越東北而止西南其修徑可知矣

七曜

日月

隋天文志日循黃道東行一日一夜行一度三百六十
五日有奇而周天行東陸謂之春行南陸謂之夏行西

陸謂之秋行北陸謂之冬行以成陰陽寒暑之節是故
傳云日爲太陽之精主生養恩德人君之象也又人君
有瑕必露其慝以告示焉故日月行有道之國則光明
人君吉昌百姓安寧日變色有軍軍破無軍喪侯王其
君無德其臣亂國則日赤無光日失色所臨之國不昌
日晝昏行人無影到暮不止者上刑急下人不聊生不
出一年有大水日晝昏烏鳥羣鳴國失政日中烏見主
不明爲政亂國有白衣會日中有黑子黑氣乍三乍五
臣廢其主日食陰侵陽臣掩君之象有亡國有死君有
大水日食見星有殺君天下分裂王者修德以禳之

月者陰之精也其形圓其質清日光照之則見其明日
光所不照則謂之魄故月望之日日月相望人居其間
盡觀其明故形圓也二弦之日日照其側人觀其傍故
半明半魄也晦朔之日日照其表人在其裏故不見也
其行有遲疾其極遲則日行十二度強極疾則日行十
四度半強遲則漸疾疾極漸遲二十七日半強而遲疾
一終矣又月行之道斜帶黃道十三日有奇在黃道表
又十三日有奇在黃道裏表裏極遠者去黃道六度二
十七日有奇陰陽一終張衡云對日之衝其大如日日
光不照謂之闇虛闇虛逢月則月食值星則星亡今歷

家月望行黃道則值闇虛矣值闇虛有表裏深淺故食有南北多少月爲太陰之精以之配日女主之象也以此比德刑罰之義列之朝廷諸侯大臣之類故君明則月行依度臣執權則月行失道大臣用事兵列失理則月行乍南乍北女主外戚擅權則或進或退月變色將有殃月晝明姦邪並作君臣爭明女主失行陰國兵強中國饑天下謀僭數月重見國以亂亡

張衡靈憲曰懸象著明莫大乎日月其徑當天周七百三十六分之一地廣二百四十二分之一日者陽精之宗積而成鳥象鳥而有三趾陽之類其數奇月

者陰精之宗積而成獸象兔陰之類其數耦其後有馮焉者羿請無死之藥於西王母姮娥竊之以奔月將往枚筮之於有黃有黃占之曰吉翩翩歸妹獨將西行逢天晦芒毋驚毋恐後且大昌姮娥遂託身於月是爲蟾蜍夫日譬猶火月譬猶水火則外光水則含景故月光生於日之所照魄生於日之所蔽當日則光盈就日則光盡也衆星被耀因水轉光當日之衝光常不合者蔽於地也是謂闇虛在星星微月過則食日之薄地其明也繇暗視明明無所屈是以望之若火方於中天天地同明繇明瞻暗暗還自奪故

望之若水火當夜而揚光在晝則不明也月之於夜與日同而差微星則不然強弱之差也

日月行道

漢天文志日有中道月有九行中道者黃道一日光道光道北至東井去北極近南至牽牛去北極遠東至角西至婁去極中夏至至於東井北近極故晷短立八尺之表而晷景長尺五寸八分冬至至於牽牛遠極故晷長立八尺之表而晷景長丈三尺一寸四分春秋分日至婁角去極中故晷中立八尺之表而晷景長七尺三寸六分此日之去極遠近之差與景長短之制也去極

遠近難知要以晷景晷景者所以知日之南北也日陽也陽用事則日進而北晝進而長陽勝故為溫暑陰用事則日退而南晝退而短陰勝故為涼寒也故日進為暑退為寒若日之南北失節晷過而常寒退而短為常燠此寒燠之表也故曰為寒暑一日晷長為潦短為旱

奢為扶

鄭氏曰扶當為蟠齊魯之間聲如輔輔扶聲近蟠止不行也蘇林曰景形奢大也晉灼曰扶附也小臣佞媚附扶者邪臣進而正臣疏君子不足姦人

近君子之側也

有餘月有九行也黑道二出黃道北赤道二出黃道南白道二出黃道西青道二出黃道東立春春分月東從青道立秋秋分西從白道立冬冬至北從黑道立夏夏

至南從赤道然用之一決房中道青赤出陽道白黑出陰道若月失節度而妄行出陽道則旱風出陰道則陰雨凡君行急則日行疾君行緩則日行遲日行不可指而知也故以二至二分之星爲候日東行星西轉冬至昏奎八度中夏至氏十三度中春分柳一度中秋分牽牛三度七分中此其正行也日行疾則星西轉疾事勢然也故過中則疾君行急之感也不及中則遲君行緩之象也至月行則以晦朔決之日冬則南夏則北冬至於牽牛夏至於東井日之所行爲中道月五星皆隨之也箕星爲風東北之星也東北地事天位也

孟康曰東北陽日月

五星起於牽牛故爲天位坤在西南紐於陽爲地統故爲地事也

故易曰東北喪朋及

巽在東南爲風風陽中之陰大臣之象也其星軫也月去中道移而東北入箕若東南入軫則多風西方爲雨雨少陰之位也月失中道移而西入畢則多雨故詩云月離於畢俾滂沱矣言多雨也星傳日月入畢則將相有以家犯罪者言陰盛也書曰星有好風星有好雨月之從星則以風雨言失中道而東西也故星傳日月南入牽牛南戒民間疾疫月北入太微出坐北若犯坐則下人謀上一日月爲風雨日爲寒溫冬至日南極晷長南不極則溫爲害夏至日北極晷短北不極則寒爲害

故書曰日月之行則有冬有夏也政治變於下日月運於上矣月出房北爲雨爲陰爲亂爲兵出房南爲旱爲天喪水旱至衝而應及五星之變必然之効也
中興天文志按三統歷日躔與堯典月令不同日行黃道每歲有差故也江默謂歲差者日躔於一歲之日間行周天度未及餘分而日已至焉故每歲常有不及之分然歲差古無有其法漢洛下閎雖知太初歷去八百年當差一度後人未究其悉也晉虞喜始覺之歷家祖述其說自唐堯至漢自漢至本朝冬至日躔各各不同然後知歲差之法得天甚密不可廢也然

又嘗考歲差諸說不同宋大明歷以四十年差一度失之太過何承天倍其數以百年退一度又反不及惟隋劉焯取二家中數以七十五年退一度故唐一行詳考三家而知劉焯之爲尤近遂以大衍歷推之乃得八十三年而差一度蓋大衍分一度爲三千四十分其所差之分一歲三十有六太積至八十三年則差一度又不若本朝紀元歷以七十八年差一度爲最密也卽其法推之慶歷甲申冬至日在斗五度上距唐開元甲子三百二十一年日差五度蓋唐志開元甲子日在赤道斗中十度是也開元甲子上距

漢太初元年丁丑八百二十七年日差十度蓋唐志以開元大衍歷歲差引而退之則太初元年冬至日在斗二十度是也太初丁丑上距秦莊襄王元年一百四十五年日差二度冬至日在斗二十二度蓋月令云日在斗是也秦莊襄王元年上距堯甲子二千二十八日日差二十八度冬至日在虛一度日没而昴中故堯典言日短星昴也說者不知歲差之法以堯典較之月令逮於今日不啻差一次求其說而不可得遂以爲節氣有初中之殊又謂古以午爲中皆失之遠矣

又曰開禧占測冬至日已在箕宿較之堯時幾退四十餘度差自漢太初至今已差一氣有餘而太陽之躔十二次大約中氣前後乃得本月宮次蓋太陽本日行一度近歲紀元歷定歲差約退一分四十餘抄蓋太陽日行一度而微遲緩一年周天而微差積累分抄而躔度見焉循是以往萬有五千年後將所差半周天審如是寒暑易位乎以俟治歷者

又曰占天之法以二十八宿爲綱維分列四方南北去極各九十有一度有奇南低而北昂去地各三十有六度一定不易者名之曰赤道以日躔半在赤道

內半在赤道外出入內外極遠者皆二十有四度以其行赤道之中者名之曰黃道凡五緯皆隨日由黃道行惟月之行有九道四時交會歸於黃道而轉變焉故有青赤黑白四者之異名夫赤道終古不移則星舍宜無盈縮矣然自唐一行作大衍歷以儀揆測之得畢觜參鬼四宿分度與古不同本朝皇祐初日官周淙以新儀測候與唐一行尤異紹聖二年清臺以赤道度數有差復命考正惟牛尾室柳四宿與舊法合其他二十四宿躔度或多或寡蓋天度之不齊隨古今而變者也若夫黃道橫絡天體列宿躔度自

隨歲差而增減中興以來用統元紀元及乾道淳熙開禧用統天會元每一歷更一黃道其多寡之異有不可勝載者而步占家亦隨各歷之躔度焉

又曰王奕按渾天說黃道九道厥初本無是因日行而強名之曰行曰黃道者黃色之中也黃道卽中道也日道居中月五星循左右而行故日道獨謂之黃月行青朱白黑道各兼黃道而言故又謂之九道也是故月道出入於黃道其最遠者去黃道六度月行黃道之內曰陰歷行黃道之外曰陽歷北爲內南爲外然漢志謂黃道北至井去極近南至牽牛去極遠

東至角西至婁去極中晉葛洪則謂黃道與赤道東交於角西交於奎南至斗北至井唐志又云黃道春分與赤道交於奎秋分交於軫南至斗北至井與漢志殊何也蓋赤道分天之半今古不易黃道本無定體因日行而爲之名日之行也每歲有差漢志主太初而言此古今所以不同也

又曰按天文志黃道北至東井去北極近南至牽牛去北極遠東至角西至婁去極中立春春分月從青道立秋秋分月從白道立冬冬至北從黑道立夏夏至南從赤道吳興沈氏云月行黃道之南謂之朱道

行黃道之北謂之黑道黃道之東謂之青道黃道之西謂之白道黃道內外各四并黃道爲九日月之行有遲有速難可以一術御也故因其合散分爲數段每段以一色名之欲以別算位而已如陳卓於三家星別其色以識之如算法用赤籌黑籌以別之耳而歷家不知其意遂以爲實有九道甚可嗤也

沈氏筆談曰或問予以日月之形如丸邪如扇也若如丸則其相遇豈不相礙予對曰日月之形如丸何以知之以月盈虧可驗也月本無光猶銀丸日耀之乃光耳光之初生日在其傍故光側而所

見纔如鈞日漸遠則斜照而光稍滿如一彈丸以粉塗其半側視之則粉處如鈞對視之則正圓此有以知其如丸也日月氣也有形而無質故相直而無礙

五星

歲星曰東方春木於人五常仁也五事貌也仁虧貌失逆春令傷木氣則罰見歲星歲星盈縮以其舍命國其所居久其國有德厚五穀豐呂不可伐其對爲衝歲乃有殃歲星安靜中度吉盈縮失次其國有變不可舉事用兵又曰人主出象也色欲明光潤澤德合同又曰進

退如度姦邪息變色亂行主無福又主福主大司農主齊吳主司天下諸侯人君之過主歲五穀赤而角其國昌赤黃而沉其野大穰張衡云歲星者東方之精蒼帝之子一名攝提一名重華一名應星一名紀星晉灼曰太歲在四仲則歲行三宿太歲在四孟四季則歲二宿二八十六三四十二而行二十八宿十二歲而周天

西漢天文志歲星所在國不可伐可以伐人超舍而前爲羸退舍爲縮羸其國有兵不復縮其國有憂其將死國傾敗所去失地所之得地一曰當居不居國亡所之國昌已居之又東西去之國凶不可舉事用

兵安靜中度吉出入不當其次必有天祇見其舍歲

星羸而東南孟康曰五星東行天西轉歲星晨見東方行疾則不見不見則變為祇星石

氏見彗星甘氏不出三月廼生彗本類星末類彗長

二丈羸東北石氏見覺星甘氏不出三月廼生天棊

本類星末銳喪四尺縮西南孟康曰歲星當伏西方行遲早沒變為祇星也

石氏見欖雲如牛韋照曰欖音參差之參甘氏不出三月廼生

天槍左右銳長數丈縮西北石氏見槍雲如馬甘氏

不出三月廼生天欖本類星末銳長數丈石氏槍欖

棊彗異狀其殃一也必有破國亂君伏死其辜餘殃

不盡為旱凶饑暴疾至日行一尺出二十餘日廼入

甘氏其國凶不可舉事用兵出而易所當之國是受

其殃又曰祇星不出三年其下有軍及失地若國君

喪

中興天文志歲星色青比參左肩小於太白

熒惑曰南方夏火禮也視也禮虧視失逆夏令傷火氣

罰見熒惑熒惑法使行無常出則有兵入則兵散各以

舍命國為亂為賊為疾為喪為饑為兵所居國受殃環

繞鉤已芒角動搖變色乍前乍後乍左乍右其殃愈甚

其南丈夫北女子喪周旋止息乃為死喪寇亂其野亡

地其失行而速兵聚其下順之戰勝又曰熒惑主大鴻

臚主死喪主司空又爲司馬主楚吳越以南又司天下羣臣之過司驕奢亡亂妖孽主歲成敗又曰熒惑不動兵不戰有誅將其出色赤怒逆行成鉤已戰凶有圍軍鉤已有芒角如鋒刃人主無出宮下有伏兵芒大則人民怒君子遑遑小人浪浪不有亂臣則有大喪人欺吏吏欺王又爲理外則理兵內則理政爲天子之理也故曰雖有明天子必視熒惑所在其入守犯太微軒轅營室房心主命惡之張衡云熒惑爲執法之星其精爲風伯之師或童兒歌謠嬉戲晉灼曰熒惑常以十月入朝太微受制而出行列宿司無道出入無常也二歲而周

天

中興天文志熒惑色赤比心大星大小類填按五星之行過有道之分則循軌順行天下義寧年穀順成過無道之分則犯鬪變色爲災爲兵曰吉曰凶未有不關於人事者也然五星之變俱足以致殃熒惑太白爲甚而熒惑尤甚蓋熒惑火也性烈而不常又爲執法之官司天下過失故其應尤爲亟也

填星曰中央季夏土信也思心也仁義禮智以信爲主貌言視聽以心爲政故四星皆失填乃爲之動動而盈侯王不寧縮有軍不復所居之宿國吉得地及女子有

福不可伐去之失地若有女憂居宿久國福厚易則薄
失次而上二三宿日盈有主命不成不乃大水失次而
下日縮后戚其歲不復不乃天裂若地動一曰填爲黃
帝之德女主之象主德厚安危存亡之機司天下女主
之過又曰天子之星也天子失信則填星大動張衡云
填星者黃帝之子女主之象也一各地候晉灼日常以
甲辰之始建斗之歲填行一宿二十八歲而周天

中興天文志填星色黃比參右肩小於辰按唐孔氏
謂五星之行金水日行一度火七百八十日行星四
百一十五度木三百九十八日行星三十三度惟土
三百七十七日行星十二度蓋土性重厚而舒緩其
行最遲故其爲變亦少

容齋洪氏隨筆曰世之伎術以五星論命者大率
以火土爲惡故有晝忌火星夜忌土之語土填星
也行遲每主一宮則二歲四月乃去以故爲災最
久然以國家論之則不然苻堅欲南伐歲鎮守斗
識者以爲不利史記天官書云五潢五帝居舍火
入旱金兵水水宋均曰不言木土者德星不爲害
也又云五星犯北落軍起火金水尤甚木土軍吉
又云填星所居國吉未當居而居已去而復還居

之其國得土若當居而不居既已居之又西東去其國失土其居久其國福厚其居易輕速也福薄如此則填星乃爲大福德與木無異豈非國家休祥所係非民庶可得侔邪

太白曰西方秋金義也言也義虧言失逆秋令傷金氣罰見太白太白進退以候兵高卑遲速靜躁見伏用兵皆象之吉其出西方失行夷狄敗出東方失行中國敗未盡期日過參天病其對國若經天天下革人更王是謂亂紀人民流亡晝與日爭明強國弱小國強女主昌又曰太自主大臣其號上公也大司馬位謹候此張衡

云太白者白帝之子一名火政一名官星一名明堂一名文表一名太皞一名終星一名天相一名天浩一名序星一名梁星一名威星一名大囂一名大爽晉灼曰常以正月甲寅與熒惑晨出東方二百四十日而入入四十日又出西方二百四十日而入入三十五日而復出東方出以寅戌入以丑未一歲而周天

西漢天文志曰日方南太位居其南日方北太位居其北爲羸侯王不寧用兵進吉退凶日方南太位居其北日方北太位居其南爲縮侯王有憂用兵退吉進凶當出不出當入不入爲失舍不有破軍必有死

王之墓有亡國一曰天下偃兵壑有兵者所當之國
 大凶當出不出未當入而入天下偃兵兵在外入未
 當出而出當入而不入天下兵起有至破國未當出
 而出未當入而入天下舉兵所當之國亡當期而出
 其國昌出東為東方入為北方出西為西方入為南
 方所居久其國利易其鄉凶蕪林曰疾過也一說易
言出而易言入七日復出將軍戰死入十日復出相
 疾過是也死之入又復出人君惡之已出三日而復微入三日
 迺復盛出是為奕而伏晉灼曰奕退也不其下國有
 軍其眾敗將北已入三日又復微出三日迺復盛入

其下國有憂帥師雖眾敵食其糧用其兵虜其帥出
 西方失其行夷狄敗出東方失其行中國敗一曰出
 蚤為月食晚為天祲及彗星將發於亡道之國太白
 出而留桑榆間病其下國晉灼曰出而下也正出
舉日平正出桑榆上餘二
 千里上而疾未盡期日過參天病其對國晉灼曰三
分天過其
一此酉戌太白經天天下革民更主孟康曰謂出東
入西出西入東
之間也
 也太白陰星出東當伏東出西當伏西過午為經天
晉灼曰日出則星亡晝見午上為經天也
 是為亂紀人民流亡晝見與日爭明強國弱小國強
 女主昌太白兵象也出而高用兵深吉淺凶卑淺吉
 深凶行疾用兵疾吉遲凶行遲用兵遲吉疾凶角敢

戰吉不敢戰凶擊角所指吉逆之凶進退左右用兵
進退左右吉靜凶圍以靜用兵靜吉躁凶出則兵出
入則兵入象太白吉反之凶凡太白所出所直之辰
其國得其位得其位者戰勝所直之辰順其色而角
者勝其色害者敗晉灼曰鄭色黃而赤蒼小敗宋色黃而赤黑小敗楚色赤黑小敗燕色黃黑小敗皆大角勝也太白白比狼赤比心黃比參右肩青比
參左肩黑比奎大星色勝位晉灼曰日有色勝得位也行勝色晉灼曰日行應天度雖有色
曰太白行得度勝有色也行得盡勝之晉灼曰日行應天度雖有色得位行盡勝之行重而色
位輕星經得字作德

中興天文志太白色白比狼星而大又大於歲星

辰星曰北方冬水智也聽也智虧聽失逆冬令傷水氣
罰見辰星辰星見則主刑主廷尉主燕趙又為燕趙代
以北宰相之象亦為殺伐之氣戰鬪之象又曰軍於野
辰星為偏將之象無軍為刑事和陰陽應効不効其時
不和出失其時寒暑失其節邦當大饑當出不出是謂
擊卒兵大起在於房心間地動亦曰辰星出入躁疾常
主夷狄又曰蠻夷之星也亦主刑法之得失色黃而小
地大動光明與月相逮其國大水張衡云辰星一名勾
星一名爨星一名伺星晉灼曰常以二月春分見奎婁
五月夏至見東井八月秋分見角亢十一月冬至見牽

牛出以辰戌入以丑未二旬而入晨候之東方夕候之西方一歲而周天

西漢天文志辰星出蚤爲月食晚爲彗星及天祇一時不出其時不和四時不出天下大饑失其時而出

爲當寒反溫當溫反寒與他星遇而鬪天下大亂

晉灼

日祇星彗字之屬也一日五星

中興天文志辰星色黑比奎大星小於歲星

凡五星有色大小不同各依其行而順時應節色變有類

凡青皆比參左肩赤比心大星黃比參右肩白比狼星

黑比奎大星不失本色而應其四時者吉色害其行凶凡五星所出所行所直之辰其國爲得位者歲星以德熒惑有禮填星有福太白兵強辰星陰陽和所行所直之辰順其色而有角者勝其色害者敗居實有德也居虛無德也色勝位行勝色行得盡勝之

營室爲清廟歲星廟也心爲明堂熒惑廟也南斗爲文太室填星廟也亢爲䟽廟太白廟也七星爲員官辰星廟也五星行至其廟謹候其命

凡五星盈縮失位元精降於地爲人歲星降爲貴臣熒惑降爲童兒歌謠嬉戲填星降爲老人婦女太白降爲

壯夫處於林麓辰星降爲婦人吉凶之應隨其象吉
凡五星木與土合爲內亂饑與水合爲變謀而更事與
火合爲饑爲旱與金合爲白衣之會合鬪國有內亂野
有破軍爲水太白在南歲在北名曰牡年穀大熟太白
在北歲星在南年或有或無火與金合爲鑠爲喪不可
舉事用兵從軍爲軍憂離之軍却出太白陰分宅出其
陽偏將戰與土合爲憂主孽與水合爲北軍用兵舉事
大敗一曰火與水合爲焯不可舉事用兵土與水合爲
壅沮不可舉事用兵有覆軍下師一曰爲變謀更事必
爲旱與金合爲疾爲白衣會爲內兵國亡地與木合國

饑水與金合爲變謀爲兵憂入太白中而上出破軍殺
將客勝下出客亡地視旗所指以命破軍環繞太白若
與鬪大戰客勝

凡木火土金與水鬪皆爲戰兵不在外皆爲內亂

凡同舍爲合相陵爲鬪二星相近其殃大相遠無傷七
寸以內必之

凡月蝕五星其國亡歲以饑熒惑以亂填以殺太白以
強國戰辰以女亂

凡五星入月其野有逐相太白將僂

凡五星所聚其國王天下從歲以義從熒惑以禮從填

以重從太白以兵從辰以法各以其事致天下也三星若合是謂驚立絕行其國外內有兵天喪人民改立侯王四星若合是謂太陽其國兵喪並起君子憂小人流五星若合是謂易行有德受慶改立王者奄有四方子孫蕃昌亡德受殃離其國家滅其宗廟百姓離去被滿四方五星皆大其事亦大皆小事亦小凡五星色其圜白爲喪爲旱赤中不平爲兵爲憂青爲水黑爲疾疫爲多死黃爲吉皆角赤犯我城黃地之爭白哭泣聲青有兵憂黑有水五星同色天下偃兵百姓安寧歌儻以行不見災疾五穀蕃昌

凡五星爲政緩則不行急則過分逆則占熒惑緩則不入急則不出違道則占填緩則不還急則過舍逆則占太白緩則不入逆則占辰星緩則不出急則不入非時則占五星不失行則年穀豐昌

凡五星分天之中積於東方中國積於西方外國用兵者利辰星不出太白爲客其出太白爲主出而與太白不相從及各出一方爲格野有軍不戰五星爲五德之主其行或入黃道裏或出黃道表猶月行出有陰陽也終出入五常不可以算數求也其東行曰順西行曰逆順則疾逆則遲通而率之終爲東行矣不東不西曰留

與日相近而不見日伏伏與日同度日合其留行逆順掩合犯法陵變色芒角凡其所主皆以時政五常五官五事之得失而見其變木火土三星行遲夜半經天其初皆與日合度而後順行漸遲追日不及晨見東方行去日稍遲朝時近中則留留經日過中則逆行逆行至夕時近中則又留留而又順先遲漸速以至於夕伏西方乃更與日合三星之行雖遲速不同其大畧如此惟金水二星行速而不經天自始與日合之後行速而先日夕見西方去日前稍遠夕時欲近南方則漸遲遲極則留留而近日則逆行而合日在於日後晨見東方逆

極則留留而後遲遲極去日稍遠旦時欲近南方則速行以追日晨伏於東方復與日合此五星合見遲速逆順留行之大經也昏旦者陰陽之大分也南方者太陽之位而天地之經也七曜行至陽位當天之經則虧昃留逆而不居焉此天之常道也三星經天二星不經天三天兩地之道也

凡五星見伏留行逆順遲速應歷度者爲得其行政合於常違歷錯度而失路盈縮者爲亂行亂行則爲天失彗孛而有亡國革政兵饑喪亂之禍云

古歷五星並順行秦歷始有金火之逆又甘石並時自

有差異漢初測候乃知五星皆有逆行其後相承罕能
察至後魏末清河張子信學藝博通尤精歷數因避葛
榮亂隱於海島中積三十許年專以渾儀測候日月五
星差變之數以算步之始悟日月交道有表裏遲速五
星見伏有感召向背言日行在春分後則遲秋分後則
速合朔月在日道裏則日食若在日道外雖交不虧月
望值交則虧不問表裏又月行遇木火土金四星向之
則速背之則遲五星行四方列宿各有所好惡所居遇
其好者則留多行遲見早遇其惡者則留少行速見遲
與常數並差少者差至五度多者差至三十許度其辰

星之行見伏尤異晨應見在雨水後立夏前夕應見在
處暑後霜降前並不見啟蟄立夏立秋霜降四氣之內
晨夕去日前後三十六度內十八度外有木火土金一
星者見無者不見後張胄元劉孝孫劉焯等依此差度
爲定入交食分及五星定見定行與天密會皆古人所
未得也

中興天文志夫二躍二氣之精也五緯五行之精也
一躍俱順行五緯獨有退逆何也班氏謂三伐盛時
天下五緯順軌無逆行者周之末造人紀不修師旅
數起故五緯始失常度而有逆行然則降姬而羸世

道趨末星軌遁常亦失其初歟易觀乎人文以察時
變故星紀之逆順可以懔然懼矣
又曰古法周天之數如歲星謂十二年一周天乃約
數耳前稱歲星在四仲則行三宿在四孟四季則在
未二宿二八十六三四十二故十二年而行周二十八
宿其說非是夫二十八宿度有廣狹而歲星之行有
贏縮豈得以十二年一周無差忒乎唐一行始言歲
星自商周迄春秋季年率百二十餘年而超一次因
以爲常以春秋亂世則其行速時平則其行遲其說
尤迂既乃爲後率前率之術以求之則其說益自相

悖按劉歆三統歷推歲星一百四十四年行天一百
四十五次一千七百二十年剩行一周此古人所未
究也又左氏疏以歷法推之周天凡十二次每次別
爲百四十四分歲星每行一百四十五分是每年行
一次之外尚餘一分積一百四十四年剩一次今紹
興歷法歲星每年行一百四十分是每年行一次之
外有餘一分積一百四十四年剩一次矣殆據是乎
餘四星之行固有逆順中間亦豈無差忒一行不復
詳言蓋亦知之矣後之考歷者當能辨之然嘗考五
星之行率循黃道惟金火二星游行不測土水歲星

爲變希則凡黃道所經順軌則不占惟陵犯留守則有凶咎如熒惑每入太微出端門星家謂受制而出實則黃道所經也而月與五星相遇亦多涉黃道內外之徑黃道邪界列宿各有尺數如房宿又有上中下三道焉此其所以易於陵犯是以清臺每言五行次黃道所經諸星占家多不驗凡以此故要諸天人之際可畏有兆於此有感於彼其出沒顯晦飛流升降疾遲羸縮進退會散動移轉徙非邈無與於人是故精祿之交明君謹之能遇災而加懼見祥而滋傲思其咎謝其過不敢怠寧王事之當然也善乎太

史公之言曰太上修德其次修政其次修救其次修禳畏天者擇焉

又曰按五星之變有合有散有犯有守有陵有歷有鬪有羸有縮有食同舍曰合變爲妖星曰散寸以內光芒相及曰犯韋昭謂自下而往觸之爲犯也居其宿曰守相冒而過曰陵韋昭謂突掩爲陵也經之曰歷相擊曰鬪又曰離復合合復離爲鬪早出曰羸晚出曰縮又失次上二三宿曰羸失次下二三宿曰縮星月相陵曰食吉凶各以類應不可誣已然有或不盡如所占何也曰日月五行俱行黃道不能無侵犯

也惟迫近則殃大遠則毋傷寸以內芒角相及則其
占始應漢志曰近者殃大遠者殃毋傷後之星史不
此之察猥見其差近遂譎張以爲變此所以繁褻不
驗

文獻通考卷第二百八十



